

章氏會譜德慶三編

卷十三之卷十六

254

0040

19

章氏會譜德慶三編卷之十二

會稽章貽賢

大司成 山章公考績序 正德元年

蘭谿章公德懋以成化丙戌會試第一人入翰林院爲編修坐言事調臨武令時  
 臺諫交章力救之改南京大理寺評事尋擢福建按察司僉事公訛譴明允執法不  
 撓甫三載赴闕陳乞致其事而去優游林下殆二十有六載矣廷臣論列相繼不已  
 朝廷特起公爲南京國子監祭酒虛位以待且令有司趣之公不得已就道既抵任  
 所敷迪皆先德行踐履之實而後參以文學所培養皆先寬閎博大之論而後濟以  
 嚴毅是論黉之三載考績在監諸君子循故事祖帳郊門外乃屬余言爲贈夫天下  
 不可一日而無教顧所以示之者何如耳故所尙者在廉則清修恬退之士進所惡  
 者在諛則頹靡柔懦之士遠此理之所必然也予初釋褐卽得公所上元夕張燈疏  
 而反覆觀之以爲詞嚴氣直愛國忠君彷彿乎蘇長公諫罷浙燈之遺意雖忤旨被  
 譴然遷謫未久改任今職余於是而仰窺朝廷所以知公者不爲不深及入朝愧不  
 及與一會爲平生欠事近者承乏禮部公奉詔亦有大司成之行聚首於南得瞻顏  
 範余於是而仰賀朝廷所以待公者不爲不厚余不佞所不滿於中而妄自量度者

天生賢才正以資世用耳棄之於少壯而收之於筋骨衰憊之時采之於聞望而置之於閒散不急之地於此未嘗不竊爲掄才者惜也先民有言師道立則善人多善人多則朝廷正夫所謂師道豈在乎尋常數墨以爲勤操觚染翰以爲能固有道也今有執經史而臨之者曰朝吾誦讀昏吾討論吾法程不可違而步趨不可苟若是者果足以盡天下才乎否也借使人人而論之事事而繩之其所遺多矣嗚呼所操者甚要則所係者甚重顧余何人敢容喙於其間哉自公領教之三年晚生後學皆有矜式恥言躁進習尙稍端則其成就固有出於文字之外而所報稱固有勝於鉛槧之末者矣此士大夫之所共知而非區區一人之所私論也於其行書此於末簡今明天子在上圖任老成用裨新政公投閒引年之請恐不得遽遂其所願也

蘭谿

渡瀆

### 楓山先生遺文序

林俊

文本諸心而根之於道主張人文鋪叙皇極感人心而裨治化後世挾奇搜博以續藻雕飾爲工文云文云乎哉太子太保尙書章文懿公楓山先生自魁禮部系仕籍幾六十年實歷不滿三載甘貧守道崇尙廉退其忠實之操質約渾古之風固已高出人流望在海之內外經世大畧大可用天下小可用於天下而石蘊淵藏僅取司



成之一遇棄之壯盛而收之衰憊之餘斯有志所扼腕也然士有山斗國有著龜以繫屬天下之重尊信大同焉及請老勤復武廟重違其意加其官竟許之上在舊邸熟先生名作而卽位思有以致之先生已望九之年縉典殊恩其不能拜矣余愧屈數老於先生尤注嚮先生亦謬余與時屬有所寄遺老之召方幸過里門接道論而先生又歿矣老淚遺容幽明相對余之無能已先生猶先生之無能已於余也既狀事行與立祠門人董遵以遺文屬序先生全集諸子都憲君拯已梓行矣是集得意作也先生專志六經附博史子意所詣極將欲起發學數百年後會北山魯齋仁山白雲之派以上接晦庵東萊之傳次之亦力追道傳晉卿景廉仲申數大家之逸響其旨深深可寓道其詞正正可寓心其筆勢平典文理簡潔卒澤於道德仁義粹如若湖海平流風激水湧以備盡文章變態文云文云乎哉

見素續集

### 章文懿公年譜序

方太古

大哉先師之成德也可謂難矣夫自幼而壯壯而老終始一致無少瑕疵可謂難者矣或曰公著述少而名彰嘗聞之曰著述外物也吾之學周程張朱而已矣既明且備心得之奚事乎疣或曰公仕日少而秩崇聞之曰仕吾志也唯其時耳出處顯晦不在我天也吾從天鳴呼壽考令終名完節全海內諸公如先師者可數嗚呼哲人



萎矣前輩典刑不可得而見矣龍亡虎逝山川寂寥載撫年譜愴焉我心謹序

送章騰霄之四川中江令序

會稽董一吧一作玘

按中江縣志章昂雲南昆明人宏治間知中江縣流賊猖獗誓死守城賊爲解去諒卽騰霄公也

予垂髫時侍家君於滇則辱與章君遊迨今二十餘年雅相知厚其爲人雄直而不肆言論弘辨而不詭自爲諸生時固已才厭流輩吏於其土者民隱士俗有所徵問鄉校之事欲有所白輒推章君先其名蒸然於上顧省試數不利貢次且及君雖隱忍以就察其意甚恨及遊太學赴順天鄉試遂中高選人乃歎其挾負誠異卒能奮迹不苟沒也蓋君自是益自負尅意力學縱獵古今書而發之爲文盡脫去舊習壬戌歲予見之京師觀其所爲文竊駭異之謂立可取進士顧又數不利己未之試名在正榜列矣又以嫌黜往來淹留京師者十餘年而君亦垂老矣今年春乃就吏部試得四川中江令以君所素負其心蓋深以不得進士爲憾然如君之才其所爲自表見者豈必進士哉夫自有進士科以來登選者衆矣其人不必要皆有聞聞者固不必皆進士且古之賢令子康以府史魯恭以郡吏衛颯以能案劇第五倫以功曹童恢以州辟此其人皆不出科目然皆卓卓然表見於後世徐淑之孝廉景莊之及第

固無稱焉然則人之所以能自表見者不係乎進士係乎其人也審矣今天下之民困窮已極爲令者不能布上德以爲民利反朘削焉譬諸木方槁斧斤相尋於其上而不彫盡者希矣君之才爲諸生時已蒸然不可掩今自爲之得行其志其肯循衆臯臯然自利已乎吾知巴蜀之間有以才能自表見卓然追古賢令者必章君也果如是其亦可無憾焉耳矣

中峯文選天  
一閣珍藏

賀封禮科給事中章翁序

潘希曾

吾金華之蘭谿處士章翁子處仁任禮科給事中今年夏四月朝廷以尊崇禮成推恩凡京官父母存者先封之翁乃被封如子官配某封孺人於是孺人壽躋六十而翁逾年亦六十矣是歲秋九月處仁奉命册封某府往返澱水之上得稱觴爲父母壽宦遊諸鄉人羨翁偕老而遭異數享樂事屬余序之因處仁寓歸以賀予之再來京師也朋舊落落如晨星得處仁與遊甚歡也處仁才氣英邁學問博洽直言宏論有聲諫垣予蓋嘗稱願曰幸哉有子如此比聞翁志懋行端周於孝義讀書講古今事有卓見居鄉不矜方爲圓而閭里多求直焉誨子弟惟禮惟義乃知處仁得於過庭者非偶然也揚子雲嘗稱無是父無是子翁之謂也又稱無是子無是父處仁不得辭也抑先王勞使民恒閔其不遑將父今處仁奉使而獲甯親蓋良便也聖天子

之恩至渥也則其衣錦承歡能不思聖天子之恩乎詩云式遄其歸翁尙爲子誦之而保王躬補袞職尤處仁顯親之大也請因賀而申其說

竹澗集

送章廷佐還金華序

吳寬

由金華至金陵水行千餘里順風揚帆不數宿可至非必供職役服商賈而有事於茲者皆可游也九州之地不能兼美文物之盛者或不足於山水山水之奇者或不足於文物而金陵固天子之都也海內文物於是乎聚而鍾山石城長江秦淮流峙而被帶之蓋古所謂佳麗地也其地美雖遠不可不遊况不遠乎章君廷佐金華之宦家也少入郡學讀書既長慨然有四方之志今年冬來游於茲適其鄉之知友一時皆在太學相見叙契闊外取六藝之文百家之言與之校讐問難以考其學暇則又相與上下山水間尋古人遺蹟以慨想其事蓋流連欵曲者既閱月而廷佐東歸之興作矣諸君以予有同學之好且嘗識君乞爲文送之莊周有云去國數日見其所知而喜夫以見所知而喜則遠游者其中固有所不樂耶蓋樂以游不樂亦以游窮登覽廣見聞則游固可樂遠親戚離朋友則游亦可以不樂今廷佐之游可謂樂矣欲求其不樂則鄉之知友一旦皆集於吾前而忘其身之去國者何嘗有不樂耶予聞金華雅多賢凡今日之在太學者皆拔其尤者也拔其尤者於太學金華賢士



之野不幾於郡之空耶則廷佐之去國也無不樂其歸也顧有所不樂耶雖然朋友所用講學以資道者道不在人則在乎書書之所載皆古人之遺言也取友者鄉國天下不足又尙友古之人誦其詩讀其書論其世而已予聞廷佐之先有山堂先生著述甚富其曰羣書考索者倘無恙廷佐試歸而讀之將有餘友矣亦將有餘樂矣

家藏集

### 送武昌章知府序

邱濬

按安徽通志選舉表知府名綸正統乙丑進士官至參政有志傳

賢儁之士如良金美玉然隨其所在而光彩燁燁旁達四出則雖雜蓬蒿瓦礫中而不可掩者自然迥與他物異小夫孺子足不入城市目不識珍異固未嘗見也偶一見之未有不驚詫而愛慕者也又况置之通衢大肆中而爲深識廣見者所接近乎予友桐城章君絲綸世胄所謂賢儁之士也登乙丑進士第擢給事中未幾左遷趙州判官尋知州事居憂解任起復爲應州秩滿起陞武昌知府方其自法從遷趙州也奔走州縣間與羣吏伍宜若不復振作矣然治聲燁燁然聞燕趙間入其境者嘉其政接其容者醉其德人之敬也無異在禁近時然及移應州極邊之地戎馬之衝其事者難爲又有甚於趙者而其政績之章章視趙爲益著而人之敬之嘉之者又

益加多焉所謂良金美玉隨所在而光彩燁燁而自不可掩君其是哉君其是哉雖然金鍊數而愈厲玉用久而愈澤吾知今之守武昌也其治在會府下其職任之重土地之廣人民之多事務之殷較之前政奚啻千百其堅強之質溫潤之氣發越之光於是乎愈可見矣譬則良金美玉在通衢大肆中者也在夫人敬重之賞識之者當百倍於前異時鑄爲鼎以象夫物用爲璧以薦之天又將於是乎取之予交君久而知之有素蓋所謂金玉君子者也故於武昌士大夫之請卽其有而似之者以爲君之官之贈

重編  
台稿  
瓊

### 章頤菴先生劄錄集序

清劉大櫟

昔在帝王之世一人正位於上而羣賢翼戴於下未聞有賢人而隱居者周衰孔子不遇於時而其徒若顏曾冉閔皆不仕官以老此非有意於隱以世無用我不得已而山林也若堯之時有許由夏之時有卞隨務光值可以有爲於天下而視若泥滓彼其人不以有道而舒亦不以無道而卷方且御風餐霞游情於日月之上肆志於虛無之鄉又奚暇帖帖焉以祿爵爲事是乃所謂隱者與吾鄉章頤菴先生生於明永樂及正統成化之年其兄舉進士爲武昌太守朝廷方入粟補官以先生之才與其資皆足以掇巍科登臚仕顧棄不取獨奉其太夫人極山水園亭以自樂此其性

情有異於人者故其爲詩澄澹蕭疎類古達人之風尙夫陶潛去彭澤而其詩甲於魏晉以來林逋魏野不仕於眞宗之朝而傳其詩至今不廢信乎有其人然後有其詩而誦其詩因以知其人生先生之後不得見先生見先生之詩如見先生矣

海峯先生

### 東稷章公知濮州政績序

許成名

按公諱大綱字希文號東稷會稽人嘉靖乙酉舉人初任濮州知州陞河南  
□□府同知

有爲濮守章子東稷余嘗贈言以旌其政者謂自有濮守以來所僅見也濮人父母之神明之當道之獎勵狎至士夫之贊詠偕作因歷陳美績甚衆聞之不覺嘉歎雖然皆守職也章子克舉之耳然其中有感余者反成獄活四命是也蓋前守徧徇鍛鍊而成者且再踰朞無愆矣章子以誠心爲政故能得其可疑之端廉之果得本賊一訊立承而四人者獲釋嗚呼今之君子能留心疑獄者罕矣况獄成已久謂爲不疑者乎於此留心其他政事肯苟焉而已哉且匹婦含冤能致大旱若郡常冤數人天下凡幾郡歲所冤何啻數千百人耶今當隆盛之世而和氣未應沴變間作殆有繇然肆我皇上恒軫欽恤比詔天下輒申苛濫之禁然爲有司者仰稱德意猶有未



至使爲守若令者皆如章子則所以當天心召和氣庶其在此所謂式敬爾絲獄以長我王國不有賴乎哉此余所以重有感於章子者也抑余又聞章子教士諭民輒示以心然則章子之政本諸心也自真西山輯心政經能體而行之者蓋鮮章子真其人哉余又欲以章子之心示諸凡長民者噫誠有章子之心施於有政何啻一獄而已一郡而已章子勉終之吾方有望焉爾

傅山贈

贈續溪章謹齋先生司教曹庠序

汪仲成

嘉靖進士

士君子在天地間成已成物焉已矣成己者成物之體也成物者成己之推也是成物固所以成己也然有弗克如其願者席珍衡筆抱道終身由無及物之階故也先生其幸獲於此哉洪維我朝崇學右文先德後藝其所以成己而成物者胥此攸賴自古迄今未有舍是焉者不獨時之盛典矣先生少以學問廣博理道浹洽文精而粹行純而懿其先君子以春秋領乙酉鄉薦先生之學得之庭訓者有自故臺試輒冠多士人皆期之以公輔器九舉不第始貢於廷先生怡然自以爲義也予盡焉計入太學以完所養人固勸之曰先生之學精矣舉於鄉屢矣雖不獲大薦而小就以覺諸人不可乎由是先生又幡然自以爲命也予安焉就浮庠職司訓持己端嚴吐詞和厚望之師道之尊而近之者雍如也每出我紫陽朱夫子之學日與諸生講論

聲聲不倦不但課業責成而已未期年多士充然有得陶成者甚衆適丁內艱士夫咸惜其去予每接聞甚稱先生素履緬懷不忘至有已矣之歎德之感人班班較著若此服闋予視先生爲親家告同北上謁銓選改任曹焉於戲曹何幸而得先生耶先生其又以所以教浮者教曹耶曹孔子故里也曹之士孔之徒也先生由是得觀孔子之風曹之士由是得親先生之教先生將進諸孔而曹之士將進諸先生道相同而志相合亦將不異於浮也曹何幸而得先生耶夫先生出我紫陽之學旣顯諸江之右又顯諸山之左其視獨善而無階以成物者何如也孔孟嘗以樂育英才爲吾道樂今先生得之其樂可知也已是爲序嘉靖丙戌仲夏朔旦眷生汪仲成書於

金臺官舍

環川文集

臨川章介菴先生口義瑣言全集序

何輝宁

物理之格聞見之知莫篤於新安良知之致德性之知莫妙於金谿由前之說夫子所云好古敏以求之非生而知之者之說也由後之說夫子所云予一以貫之非多學而識之者之說也一則下學有其方循塗而至一則上達無外假卽此而在由後之說不若由前之說之眞積歷久而自得也要而論之窮理盡性以至於命灑掃應對進退與精義入神貫通只一理所以謂大人不失其赤子之心人之靈明大於身

安能日積月累從事禽獸草木蕃雜不可知之數以玩物而喪志乎是以古今資平近者率彼道及夫稟之簡曠傲兀未有不經省返觀而自喻者也吾鄉章公袞字汝明號介菴先生生明正嘉八股金科玉律之時獨傭奴選詞不爲科舉之學專於一心爲功其大指云物只是心上物格只是心上格述王文成先生詩云人人自有定盤針萬化從來總一心却怪從前顛倒見枝枝葉葉外邊尋先生更之云人人自有定盤針內外從來總一心識得兩頭都是我不用拋下不用尋陽明先生胞內識心先生無外非心其於內心一也故曰物有內外心無內外然而先生有云處身處事只求心安甯使唾手丟却更不須商量毀譽好惡先生之言直水到渠成露湛瑩淨明心見性內外合一更無轉語夫子所告顏回一日克復天下歸仁者也凡致功於心者孰不願之然而研索擴充之苦無優游簡徑之樂故特病其難然而人之心亦生而有殊不可一視昔范淳夫女讀孟子出入無時語曰孟子誤矣心豈有出入伊川先生聞之曰此女雖不識孟子却識心了朱子曰此女天資必高見此心湛然安定無出入內外人安能皆如此然則先生與象山陽明之學實天資高邁而歧出於此謂其拂聖經而謬戾於子朱子則非也洪範曰凡厥庶民有猷有爲有守君子之學隱以澄其心性發以舒其精神事業者精神之標也不及爲歛文成先生伏宸濠



殄谿洞象山先生踞鹿洞講席析義利聞者色然汗下先生則諸生時倡修冷泉陂隄其於江西舉場點名初一道首南昌以次及先生翹然賭勝角奇博瞻速於南新巨子間一切皆莫能如今之撫臨與南新乃分東西兩道魚貫而入得不擁擠晚暮先生力也先生在臺垣時嘗抗議祀典見謫勿憚及其致政而歸驅車出宿不俟朝命有立朝匪躬之忱有難進易退之節然則存之固守之正發之果而確無難陸王之徵兆於外與先生揆一所學豈偶然哉然先生晚猶不自信其學嘗曰近來覺昏憤時一檢點自謂無大破缺隨思此卽是學問不長進處又追咎向臺垣時雖言事君之心未純然則先生之學識日欲進於高明廣大可知又豈斤見量聞之士所能挹其源窺其奧哉先生所著學庸口義隨筆瑣言以及詩歌往來書札其家世嘗更易輯錄之然自王荆公序文外多殘缺訛謬不可讀口義初梓行以時之競於詞章訓詁先生獨家名其心學也鄉之人罔識之宁得其傳錄遺編於先生之族幾世孫某以先生之爲功於心學於新安金谿實有得焉不可以不傳也章氏譜宗畢亟鏤之板而余爲之追本其指歸而序之

臨川縣志曾子洋寸園存白初編內有代范  
 太守所作章介菴先生集序僅古文遺稿十  
 餘卷亦散佚之餘由其裔孫子文搜輯成書擬梓以  
 行世亦可謂後起之英不忘析薪負荷之義者矣

蘭谿章道峯集序

徐拭

道峯章公以名進士歷官行人給事茂著風節輿望翕然歸之其尤大彰灼者嘉靖之季力請二王講學一疏慨然以宗社大計自任至犯艱危而不懼蓋忠赤獨秉而非以詩自見者也顧平生奇抱未罄遽成今古矣所爲會景興懷吐露珠玉鏗然有聲者公之諸弟述邁等彙而成編予時在滇謀諸同年月泉章公壽諸梓因諷誦之見其冲淡閒遠逸出宇宙外求之古人陶淵明真可作也古之與盟詩社者建安正始以前曹劉鮑謝振其響盛唐之際李杜韓柳擅其宗聆其音律望其氣象高妙古雅豪逸華麗種種互陳統之鈞天廣樂之音各鳴其盛卽淵明甯不揖讓耶然恬澹若太音希聲則淵明爲獨步以所自得者殊也蓋其不事二君無求榮利脫塵垢之外而託三徑以自娛評者謂其詩不煩繩削而自合又謂之醴泉慶雲出爲祥瑞吁盛矣殆凌駕百代矣章公鳴於曠世之後若契券然者豈摹擬於體態音節之間已哉其所自得者同耳公浙之蘭谿人蘭山秀麗代有聞人語昔金華文獻之傳鳳翥麟遊照耀史冊而楓山章先生尤爲我明理學名臣第一流公紹承世系有光前烈忘情紛華一志賢聖自得之蘊誠越千載而遊神乎靖節之堂奧者歟其鳳鳴熙代與駒隱僞朝形迹不同而風采畫一者矣詩之類也詎偶然耶宜乎誦公之詩而悠然南山停雲靄靄之興隱隱言外也然則公雖未嘗以詩自見讀其詩不可以知

其人乎如以其體制音節之似而已則非知公非知陶者也尙可與言詩也哉歲庚午月泉已成梓迨壬申余叨撫西江與蘭鄰壤見公之子泰臨得詞調記序若干篇并請講學疏附於詩後若公生平履歷余誌已詳悉之矣

蘭溪譜

章景南給諫詩集序

王世貞

自昔人謂言爲心之聲而詩又其精者予竊以詩而得其人若靖節之言澹雅之超詣青蓮之言豪逸而有喜少陵之言宏奇而饒境左司之言幽冲而偏造香山之言淺率而尙達是無論其張門戶樹頤頰以高下爲境然要自心而聲之卽其人亦不必徵之史而十已得其八九矣後之人好剽竊餘似以苟獵一時之好思躋而格雜無取於性情之眞得其言而不得其人與得其集而不得其時者相比比也當余成進士時與同舍郎李伯承爲詩頗有聲而章君景南爲行人出從一蒼頭羸馬敝衣驟而見之不知其爲官人與之語亦不知其能詩者間一過從章君陋巷席扉香一縷出其虺而始知有君煑茗匡茶徵其詩數篇相與吟咀怳然而若置身陶章之間而厭吾曹之工於藻也已稍與深語則無非詩也者徐而察其眉宇則亦無非詩也者然章君旣用郎高第補給事時上諱言立太子而君首上章立太子忤旨幾中奇禍少解引疾歸臥金華山中予旣驟得君而驟失之日夕復望其起而報君逝矣君



之卒其鄉之薦紳先生惜其人相與請而祠之學宮惜其詩相與梓而行之世又二十年其子某屬余叙而余始盡讀之然後知君之詩非君之詩而陶與章之詩也有所取至於篇則無問句有所取至於句則無問韻意出於有而入於無景在濃淡之表而格在離合之際其所以合於陶與章者雖君之苦心君亦自不得而知也陶章之言瀟灑物外若與世事夙相左者然陶之壯志不能讐發之於詠荆軻章之壯跡不能掩紀之於逢楊開府彼雖僅有以自見要之皆非其得已者而君之壯獨能用之於立太子疏天下不以空言少君則尤可重也余故備著之欲使後世知有能以心之聲而爲詩者章君其人哉章君其人哉

夔州四部稿

贈兩峯章公榮擢化州刺史序

陳九仍

古有以邂逅而識其生平因鄉評而卜其事業鑿鑿然如持左券相質顧今未之或覩也乃歲戊辰當大計之會予適計偕至偶廁名於天府貢髦之末時漳平邑令闕銓部以兩峯章公擬補章蘭邑名家也予始候於都下見其色溫辭和藹然陽春如掬私心已爲平之士民慶矣因言於侯曰平民之敝極矣兵燹相尋十室九竭繼之以蒼鷹秋荼煩擊而不已黎氓之存無何喁喁然日夜望父母我也匪侯之愷悌其孰能靖之鄙人以是卜一方之福也侯遜席至再未幾予奉差命南旋至則侯之政

行數月矣小大歡然同聲不擾熙熙然如轉伏熱而厝之於清涼爽塏之處果如都下期然厥施猶未究也而余復北道其鄉無老稚貴賤嘖嘖然謂兩峯爲恂恂長者則又歎曰信哉其脩之家者豫也迄今令於平六載矣余之服政於部署有年矣凡平之人有應書來京師者有輸粟至者有謁銓至者有兌拆來者咸稱侯之安靜不擾愷悌如初且述其絕苞苴捐金矢蘇里甲省冗費去鞭笞通悉下情新樵樓祠鄉賢名宦脩城池諸役無煩於有衆則又歎曰信哉邂逅概生平鄉評卜事業吾於章侯其明徵也茲者宦聲上達課最彰明化州之擢至矣然竊謂侯之才之政不止此也其安靜可以坐鎮雅俗其慈和可以培植元元昔漢時循良吏有增秩賜金或補公卿之缺矧清朝新命哉予於茲有厚望矣時心泉楊友以歲薦至因貽於予曰兩峯父母之施於平者渥矣茲行化之日早晚望甘雨隨車而平之民又將臥轍攀轅而不忍一時別者公何以爲去思贈也予曰嘻若是乎義之不容默默也乃追憶其耳目所睹記陳顛末因楊友歸以致之

同上

贈州太守兩峯章公北上序

兩峯章公浙之簪纓世家也以福建漳平令擢守廣東化州幾載半矣君於民間如子父相親無何以蒞任愆期赴京改用報至士民悲咽淚簌簌下者盈里閭也適院

委郡推竇公公至士民遮道號愬言所欲留之意哭聲大震竇公亦爲蘇蘇隕涕因撫士民曰允矣太守之賢宜士民之不忍一朝去也如上命何百姓其安之已又如府如道日哭於庭府道之撫士民亦如竇公言則知上命之不可違寇公之不可借也於是里排張元選州吏吳震等詣余公署求所爲文以贈公余不善文曷足以揄揚公之盛美顧亦重有感焉世風彌降學士大夫不談隆古一綬臨民則役役爲私橐計甚者武遇其民而魚肉之間有操持清約則矯激取名不求豐貲於一時而干膺仕於異日也其又不然則以廉病人卑視天下而污濁之乖戾忤物至不可一日處公甫下車輒釐舊弊剔宿蠹若將與民更始人謂吏治之初靡不有然矣施及於今民所質成輒令相和解而已吏謂以罪議罰公曰爾獨不視民居乎干茅爲屋甯得罰緩之贖耶其逐之權樞要府竟相絕迹或諷以入謁輒曰進退命也吾安能賸吾民之膏血以爲吾崇奉之貲耶不求於利亦無干於名溫溫然示人以可親僚屬之間情若弟昆暇時恒以清白相砥礪有微瑕輒掩之吾嘗俯仰古今而求所以擬公者有吳隱之之清操而無書政府則劉安世也有龔遂之教化而金玉君子則傅堯俞也若公者可以今人求之哉公之善政見於士民所保留者不可殫舉化人德公方深而公竟不久於化母亦數使然耶然化人私公而不得則將公公於天下以



公爲天下公而化亦有以遂其私矣公聞命超然有高蹈之志嗟乎公忘天下也而忍忘化人哉吾故敬書之以贈公且致勸駕之意云

同上

別章君美中之齊河序

王慎中

往余督視山東學政好以名檢禮法摩礪其下其所爲教尤謹訓典而範物軌誠之不至本之不治是以詳末而多文人之性習劑量不可強齊其視余教常若閑之地過之則踰不得直行而坦蹈余乃忘其德之不足而急於必行也而求助於郡邑之學官其求助之急故其待之厚待之厚故其責之也密然而頑鈍悞慢者皆患其厲已而有所不安見謂迂闊煩苦而倍違怨疾之害作蓋一路數州之廣學宮以數百人而肯於助我者數人而已章君美中其一也君於是爲兗州泗水教諭其束身飭己奮然以師儒自命不爲苟得雖交際之好耳目習常以爲固然而名之曰禮者猶有別擇而慎於所受不爲濡利以害禮至於夙夜敦敏離經敬業率其弟子以修上之教者盡應於期命無所遺失雖有操切鈎考之密而不得舉其缺也余於是忘其不足以爲使皆助我若此亦何患教之不行哉未幾余稍遷去山東天誘其衷日以有聞悔前之爲而知其德之不足也蓋非惟謹典訓而範物軌無以諭人於精微使之敏功起行而悅於向道而其謚名矜迹依憑之勞而假託之似尤非所以爲學

也既以自愧因以疑章君之爲人意其矯強蹈厲苦心刻意企當世之名而殉驚衆之行是以其求之急而應之無難責之密而守之不失也去年春章君以服除來爲晉江教諭余已罷歸晉江吾邑也得以脫去名位之拘綴而修游講之雅君淡然禔簡有以自足常處於間靚寡營之地猝然迫之而有不動囂然誘之而有不逐非所謂企名殉行如余之所意者也嗟乎余之陋也彼其後之所以意君者既失之而其時之所以嘉君者亦豈爲能知君哉君方有齊河之授旦夕且行余其能無眷然於茲別乎齊河故余視學之縣也今其自悔者固難以追改而偶有聞者又不得與之共爲也君行矣出政發慮與民布利而去害宜有餘閒以詔諸士其尙相與講焉求進其所聞以逭余之愧也哉

遵巖集

### 章道華憲副詩集序

皇甫汈

憶昔先帝中葉歲在辛亥余免母夫人喪赴闕下謁銓宰聽補職時袁州相君雅好文又特工於詩有長沙之風數開閣延余談未嘗不移日也以故都人士多造余問詩律戶外沓屨也章君道華時爲廷評獨含章韞藻若無好於詩者至觀人之作絕口不言察其色了了若辯雌黃在頷矣逮後十年所而君解憲歸余亦自滇中免俱爲吳逸人杜門述造始稍稍出其詩相詔詔余輒訝曰君詩驟進不當如是耶今上

嗣位臺薦交騰未及起家奄忽捐館悲哉仲子士雅捧其遺草請余芟定之展卷三覆其詩往往負逸氣尙奇語先體骨而後聲韻多興寄而寡祖襲可謂今之八元矣且湛思邃討鍊字綴句音非朱絃辭非黃絹甯棄去不屑就也其精如此君之熱中消渴促其天年殆詩之罪哉評者謂詩不必徇名此乃知稀我貴道家者流睽俗憤世藏山之業有若太玄覆瓿於前論衡獲寶於後詩則不然朝成於己手夕嗜於人口紙貴都門譜傳樂府近自鳳掖遠屆雞林庶乎可傳於世奈何今之能詩者鮮而知詩者尤鮮羣譁其是無當於古人未足以爲重或詬其非奚畔於作者未足以爲輕由斯而論章君蓋深於詩矣篇章雖少靡瑕掩瑜顆珠片玉皆珍也君宦蹟所至每以文飾吏抗節峻行不躋通顯歸益減產大漸之日衣不盈篋錢不滿緡惟圖書數卷而已諸子至無以自給人共惜之嗟乎詞人不復作徒存士穎之編廉吏不可爲莫振叔敖之嗣聊伸序於李華終負慙於優孟君幸不忘者其在斯與其在斯與集自余選諸體詩共得三百二十四首勒爲六卷同校輯者文學魏學禮張獻翼云

皇帝司勳集

送青陽章司訓先生之臨朐令序

王世貞

記余在嘉靖中以按察使者飭治青州兵當是時青人數不率叛書亟聞蓋十年而



三勤王師而宅萑苻之警與俠少亡命探丸殺人椎埋剽攻者不可勝數其號爲稍馴者卽山鑄山卽海煮海以自給足又馴而習耒耜之業者歲所收穫皆入私廩不知公家爲何曹余乃選健吏分部驍卒破離其黨與窮其窟而剪之諸勇私怯公之鬪橫利忿枝之徇囂訟舞文之習一切受懲稍稍稱治屈指已三十年而青人尙有能言之者顧余居平自恨階稍重不能得一邑而治之爲之畫地課耕平賦息力以規十世之利爲之化誨誘導詩書其俗以收一變之效而僅僅用柱後惠文彈壓之雖其所就理者廣而其所爲德不能深且久也余自解郟襄之節歸頗時時爲人語之而今年春青陽章君用吾州訓導超拜臨朐令以行臨朐青望邑也去郡五十里而近其山多出中下今其民人雖不能無錐冶之競而視都會稍樸而畏法以故差易理余嘗按部再過之令亦時時詣府請約束大槩訟謀省可視宅邑十之三賦雖稍稍不及期然亦不至錮之私室且聞邇者有天幸屢得賢令爲之拊循而整齊之當易易矣章君以公車之僑屈司吾州訓故事自公車出者不當司訓司訓則當有寮長而君夷然不恨也出入雁序唯謹暇則延見諸弟子與談經術於費輕重母所厝意爲之長與爲之弟子者甚安之居三歲餘未嘗飾行以干觀風者之薦而薦自及未嘗一通政府露其屈抑貧困爲可憐狀而除目亦自下於是其寮率其弟子而

乞余一言之贈且謂余故青使者能悉青事余雖居恒自念欲官一令自効然余能悉青使者事不能悉令事也於古青使者而得一人曰曹相國參延老子之徒蓋公而師事之以清淨毋擾獄市而青大治及其入相漢亦不過守蕭鄼侯之畫一者而已章君之夷坦任率寵辱不驚於資近相國矣雖主要主詳之用殊其貴於清淨毋擾一也章君勉乎行哉爲我按求前數賢令之成事而以曹相國先後之意行之必有起而歌頌君者當知余言之不謬也

弁州續稿

金華香溪章氏重刻傳芳錄序

自炳

傳芳錄者慎齋先生輯之於前從孫兩溪公上承先志繪像而刻之以垂諸後者也奈後之人不仰體前人之志藏之於家因與敬宗錄等集盡遭回祿無有存者自炳與聲推等不忍其煨燼而無傳也商以祠金緣照舊本摹寫遺像再行繡鐫以傳諸不朽復使後之人賢者見之有以鼓其躍然繩武之思卽使愚不肖者見之亦有以作其肅然起敬之念豈徒曰爲觀美而已哉不肖獨怪族之人有目不識丁者輒誇人曰吾香溪章人也誰敢當我哉四方鄉愚亦視彼爲章人也無敢與彼較獨不思吾家之得以望族而冠於一鄉者正惟是簪纓濟美後先輝映而然若使前無純修盛德之祖宗後無光啟繼述之賢哲族何能稱望而使各姓之敬畏若此哉吾願族

之人爲祖父者當履仁蹈義尊師重傅以預培子孫發達之基爲子孫者當敦本尚實孳孳好學以仰副祖父屬望之心其有蜚聲譽序者當研窮二酉慮以下人毋氣高自足使酒詈人以負山川毓秀之意其有釋褐登朝者當廉慎居官平易近人毋貪黷以玷官箴毋橫暴而欺鄉里令人景行而嚮往焉其有潛德勿耀者當樹鴻儀於一代標清風以勵世毋盜虛聲而惑俗令人仰止而欣慕焉庶使是錄也可以繩繩附美於後可以濟濟倍盛於前芳之傳也洵可不朽也哉後之人其勉之

傳芳錄

送湖廣長沙府推官斗野章公之任序

致仕兵部尙書趙大佑

按安徽通志公諱淮字源豫績溪人嘉靖己酉舉人授太平縣教諭升長沙府推官歷署善化瀏陽縣篆皆有惠政

今之豪傑之士不爲少矣其能譚聖人之道亦不爲少及觀其隱微利害之際往往變其所守何哉志不堅也志不堅者心不誠也心不誠者名不稱也斗野章先生新安豪傑士也捧檄來署吾庠每以聖人之道訓迪諸生具率先躬行不徒侈說蓋誠心敬事者也大佑得告家居間與共朝夕上下議論談及幽玄見其卓譚及利害見其守察其神色見其所安先生誠心學問故於談論中窺其不易所守也方今聖天子圖維化理登循俊良於是先生有長沙之擢文學墟南陳公賀之謂先生苜蓿冷



署自茲可以吐才樞要也古松張公有不滿焉謂先生宏才淵蓄不及蜚聲甲第爲可惜也余謂二公之說皆知而未盡知也先生誠心學問故筮仕卽誠心教事自茲以往誠心愛民卽長沙之民其有瘳矣誠心佐郡卽長沙之守將協恭矣昔趙閱道嘗節推長沙僞印疑讞民頌其寬蓋閱道於晝之所爲夜必焚香以告天其誠於治心者也有不誠心愛民乎故其爲政琴鶴著清垂芳百代不特惠及長沙已也范伯達亦嘗節推長沙帥將斬人范白其誤帥已署不易也范曰節下奈何重易一字而輕數人之命此誠心於佐守者也故帥終矍然從之自是府中事大小悉咨焉以今先生處心之誠將古人與稽聖賢同歸矣卽冷署何嫌樞要何赫甲第何榮不甲第何歎雖然先生署吾庠二年矣不以家累自隨衣衾圖書以是而來亦以是而往所增惟雁山一圖贈言一帙耳嘗觀蘇長公送俞節推詩云吳興俞君子清如朱絲琴一唱三歎息至今有遺音余無所贈故歌此以送之

隆慶元年  
瀛川譜

壽尊師章南洲先生序

陶望齡

古之爲師者多碩大昌茂有難老之慶周盛時鬻子呂望嘗爲師鬻子九十望八十始顯融於上迨其末季有李氏伯陽者隱於柱下以言道德師於其徒而伯陽年尤永後之神仙家皆膠傳焉降是而有傳經之師漢時申培公伏生皆經義老師也迨

其傳業而申公八十伏生九十餘矣後漢又有伏恭桓榮亦咸以耄耄之歲人主北面問道尊爲老更何其盛哉豈道積而著教久而光非壽考蔑以見與抑其道德之所韜蘊理義之所膏灌有以澤其身心而導其天和有壽道與不然何古之師者之多老壽也夫道之不可以不明而教之不可以無傳也久矣古已謝而後未至中綰之維師其人其人者非有強固康豫之質與黃髮兒齒之壽則道固不可以易明而學固不可以易傳也天而愛道則其人者豈非所擁護保右偏厚而私隲者哉於今則有吾師章南洲先生先生蚤歲與其二兄俱以才氣著名號爲章氏三傑二兄者皆前後舉進士去而先生獨十一試不偶身益困名益顯教亦日益傳餘欵遺唾門下生拾一二以發其身者八九人一時言師門之盛無與比而先生風格嚴整剛毅振發當華亭長洲二相君總揆時咸慕交先生先生與抗談平禮賓主之間甚莊然終不以一語爲請寄其方嚴修潔大抵然也以故先生之爲教不嚴而肅師道之尊亦無如先生者不肖之事先生也最後自執棼來十四五年而先生年且大耄然體充而貌澤趾輕而語健視聽飲食又加壯焉世之言壽考寧固又未有如我先生者也不肖蓋深惟造物之意常不愛一日之遇一身之名輕以畀諸人人獨均是人也而人師其言行足述而道德載焉者恒使人不得而輕有之彼均人而人師者其所

就非一身一日之烈而已也造物之於是也必有以摧剝困抑之於始必有以擁植栽培之於後不困其始彼且就其一身一日之幸而無以廣業於衆也不培其後則緒不竟教不遠以先生之初與今運數之有通塞名壽之有虧盈異矣而造物之意則有所虧塞於彼而通盈於此要欲以成先生之爲師顧不厚甚也哉先生壯時嘗以周易筮之得謙之繇曰大蹇朋來先生曰吾其不及進乎然吾門必有興者已而果驗然則造物之以師道歸先生也信矣是月之十一日先生壽期也先生子永寧君方剖符於洛其門人焜等載酒於觴敬代永寧君獻萬年壽而爲辭者陶望齡也

歌  
集  
卷

章寧州詩集序

前  
人

柳子厚白樂天詩皆本靖節山谷老人謂子厚有陶句而無其情樂天有陶情而無其句信矣蘇子瞻廣陵詩始和飲酒詩二十章惠州所和遂無遺什至其得意自謂無愧作者古詩之有追和自子瞻始也夫依次爲韻韻向而意殊約體爲文文成而理勝則吾服膺子瞻如以句與情或離或合有餘議焉噫豈不難哉寧州公章氏名秉中以嘉靖甲午鄉貢進士一守寧州遽謝歸家偁山之麓以詩隱者十年上自十九首下至唐人雲門諸篇無不武其韻而廣之而於陶詩用力尤勤語尤近然自吾



鄉人無能識先生爲詩者僕所居去先生邇甚亦未有聞也辛卯僕以病退耕里中先生子太學生其始以葛山人曉所輯詩一篇示之既竟讀益自愧歎其居處之近而知先生之晚遂受而爲序曰詩之道本情而發於境夫心迹之不能兩遂而情境之不能兼適也久矣子厚年少嗜進竄逐夷徼山牢海拘而勉爲嘽緩流連之語視彭澤令爲何等哉蘇白競爽縱心夷曠抑亦陶令之次也然樂天年六十餘猶蹒跚分司廩秩子瞻亦自哀半世出仕以犯世患垂老嶺海外欲以晚節師範彭澤萬一而不可得其心跡情境之間蓋有可悲者寧州壯歲解綬老而有以自樂觀其出處之槩旣幸於三子而與彭澤合符讀其詩所謂意殊理勝者雖少遜子瞻若其情與句則可謂兩近矣詩不云乎惟其有之是以似之豈不信哉寧州集若干卷諸體詩若干首予獨就其和陶詩論之云爾

同上

### 舒城章侯德政序

浙巡按舒城人任天成

今天下脊脊多故聖天子宵旰圖治側席求賢而於親民之官尤重故鑿坡臺鎖之選大半出於長令蓋令宰一邑非他官比而爲令於今又非僅簿書期會之間奉循無過已也白社之提封寄之小民之軀命係之自非文武備足曷能當一面表百城乎邑侯章公可試以天下第一品望作令吾舒舒固劇邑土瘠而俗耽公以僑之治

鄭亮之治蜀者行之毅然之概肅於秋霜介然之操矚於皎日剽紛理劇又恢恢乎其游刃也且熊車甫下烽烟傳警士民皇皇莫必且夕公嬰城固守舞榭援桴一時呼聲震天勇氣百倍奇畧一施賊遂駭愕宵遁矣孤城纍卵恃以無虞者不可謂非一擊之力至綢繆拮据淪風枕戈歷三稔如一日焉浚深隍則湯湯天塹也繕城堞則峩峩百仞也製金革練甲士則燁燁雷霆也聲靈遐震西賊膽寒藜藿不採金湯屹然公之功不可忘矣重以征繕頻興儲需繁劇公不煩撝指而糧糗芻茭咄嗟立辦殆左宜而右有者歟靜以安人力能禦侮語云有文事者必有武備我公之謂乎以視古中牟之雉蒲亭之鸞其難易相去爲何如哉且氣宇冲靜裘帶循循詰兵戎而書糗糧穆乎若無一事誠公輔器也淵衷汪度又豈可以淺深測哉方今時事孔棘士大夫有才能者甚少以公之才謂登樞要而濟時艱將以造命一邑者造命天下如燧之火珠之露可立致也公政成報最徵書且旦夕下適以制歸里舒人士佩德者咸歌詠以誌不忘輯成而屬序於余余不敢辭不文聊綴數言以代九箴之什

遂安洙水譜

章格菴侍郎遺書序

先格菴所著書初名籟適樓遺集先生曾孫景侯出其藏稿頗多刪畧族子

章日會記  
調校讎先生遺文而以刪逸者別爲一編今就二本刪除重複得奏疏七十  
有九論著一十有八記傳九詩賦四十有一凡一百四十有七篇定著四卷  
別爲目錄一篇授族孫文欽覆審訛誤又以文集之名起於後世而樓亭軒  
館名其集則宋元以後文人所爲不能得立言旨趣及校讐流別之義故直  
題曰章格菴遺書

宇宙有傳人而後有傳文文有流別人有題品就其流別題品之所至而參伍異同  
辨別歸趣而達於大道此古今之通義也顧天下有人著而文不彰或文傳而行不  
掩二者皆託不朽於當世則人之與文不終有異與要其卓然不可磨滅者推之古  
先聖王教澤所遺而有合則行固尙矣而文之足以傳者必其中有獨得而非規撫  
工拙品藻翰墨一切率以爲文者之所得冀也先生生有明末季出劉先生宗周之  
門粹然爲當世醇儒觀其對策及選擇將帥諸議慨然思以所學經緯天下而明丁  
厄運公是日非先生立朝卒與樞鑿牴牾再起再蹶生平所負僅以風節振竦一時  
何其窮也迨至天步旣改東南小朝廷竊據朝夕先生所遇益以不合至於槁餓空  
山披緇行遯追維乾清召對之記公心典學諸疏凡所謂託諸空言皆如隔世嗚呼  
可謂不幸也已自古鼎革之際人才挺生然而文采詞章或多隱躍未顯若淵明詠



史之詩臯羽西臺之記詞旨悱惻哀怨動人其有新朝忌諱史氏深文則是非混淆  
後人無由審定惟先生正色立朝昌言碩議磊落光明悉本生平學術而行遜以後  
言不及於世事文不著於篇籍昔人讀尙書至勘黎微子諸篇以謂諸臣但能咎商  
之亡不能詆周之興乃爲周德之至豈不信歟先生大節及其生平行事著於明史  
與黃氏宗羲邵氏廷采所爲傳狀茲不具論其文之有裨於當世而不可磨滅者揭  
之簡端庶見淵源之有自

章氏遺書

章氏會譜德慶三編卷之十四

會稽章貽賢輯撰

銘

新昌章君養志樓銘

劉儼

志者心之所之也心之所感非一志所向亦非一事親者若何而養其志哉曰誠而已父母之保赤子心誠求之非有言語喜怒且不中不遠况親之志發於外獨不可以誠求乎使爲子者反於身而所存所發無非誠則隨其所向無往而不養矣世降道微人惟衣服飲食之奉曰志云者則訕而侮之以謂惟曾子爲能及吁謬矣父子之道天性聖凡所同也賢希聖士希賢豈今人不如古人哉新昌章君以剛奉其父胥民先生克盡孝道而名其樓曰養志蓋有志於復古者予故喜銘之親兮生我我卽親枝血氣百骸相貫通而矧是心志爲心之主誠以求之契於無語所敬亦敬所愛亦愛先意而承百不一背必之親喜斯爲能養曰口與體奚足嘉尙奕奕聖門參乎庶幾高風百世是爲我師

劉文集

會稽章君密菴堂銘

有序

吳昉

徵士章公名鉞字克威乃會稽之望族也爲人謹愿言溫而氣和學博而識明雖韜

光弗耀而賢名籍籍已聞於士大夫間久矣公理官務治家政卽迎刃解未嘗以旁午輻輳爲慮至髮種種亦然故於家居之西築別室爲藏脩之所以間計則三四焉遂自匾曰密菴蓋取於節之初九不出戶庭無咎之義其意在密言語以脩厥身也吁公以是名菴則知其賢於人也遠矣余重其請故忘鄙陋而樂爲之銘銘曰

噫維語言乃人樞機召榮之麾取辱之基欲脩厥身莫踰於斯脩之何如慎密是資爲君不密則臣必離爲臣不密則身必危大易所示周孔名規小人罔念君子克持禁絕躁妄致審幾微言既能密行必無違朝惕夕厲念茲在茲菴以是匾令名永垂

併山

三桂堂銘

有序

會稽併山有名家章氏焉宋理宗景定間斌舉於鄉爲第一人其後中禮部會試者國朝永樂二年敝第四人正統元年瑾第七人敝斌立孫瑾之父也自斌至瑾五世而三人者名顯科目鄉邑因匾其里曰三桂里其堂曰三桂堂古者有善則以表厥宅里示勸此之謂也至於鄰氏一枝竇氏五桂人皆取以喻一時之美章氏宅里有名與所以名之義有自來者如此嗟乎一枝已足詫矣而况三乎出於一時已足貴矣而况於世出乎斌值宋運衰去隱約而止敝父子遭遇聖明得賜進士出身以顯



敞字尙文今累官禮部左侍郎有譽望於天下暨瑾俱駸駸然遠大之域未可量也  
一桂奚足爲之詫哉嘗求之桂雖微物然其根培之厚則發爲榦也大榦大則其枝  
從而茂此自然之理也君子植德於始有同其根德厚則慶之流於遠亦如榦與枝  
之大且茂矣宋王氏之三槐可徵則章氏之三桂豈真無足詫耶侍郎公與予同脩  
五經性理大全諸書至今相好最久瑾又予考禮部試所取士故屬予以銘銘曰  
會稽於越如岱在魯曰稷曰傅前瞻後顧鑑湖娥江秦望天姥周覽於堂羅列階戶  
堂開巍巍面高臨清挹奇據勝毓秀鍾靈有書在墉有桂在庭祖孫相授本枝同榮  
猗與三桂惟德所就根榦枝葉匪德弗茂千歲四時德乃可久恤德或懈栽培徒厚  
偉哉章公再世顯榮旣茂且久與桂俱崇雖肇自昔實脩於躬我銘有徵來繼何窮

澹然集

金華章公環綉亭銘

張益

寶婺之墟山高水深鬱鬱章園出乎層林云誰作亭宮講之後何以爲名粵惟環綉  
三洞豁舒神仙所家雙溪縈洄暖口流霞朝嵐夕陰岡巒起伏竹翠松青蘭芬桂馥  
風輕日舒與客登臨憑欄四矚有樂其心心之樂矣境之勝矣東風涵碧斯可並矣  
秀氣所鍾匪物伊人實生厥嗣珥筆楓宸崑崙始坯其來泄泄我銘斯亭用垂永久

書室銘

懋

有崇其阿有幽其室高不數仞廣惟容膝其蓄惟何易象書詩春秋戴記周官禮儀諸子百家史志群書牙籤萬軸森列左右編殘蠹魚文古蝌蚪一室之中靡或不有宋牖晨啟孫戶晝扁坐我管榻對我韓檠窮年兀兀誦習講明嗟世之人志在科第剽竊爲工括帖是記於理茫然苟圖富貴亦有誦書爲文是資口不絕吟手不停披含英咀華瓊琚其辭二者之學爲人而已世俗所榮君子所鄙維彼哲人學求爲己博文約禮夙夜拳拳所與歸者古昔聖賢科第文章繫我餘事我銘我室式勵厥志

楓山集

說

龍泉章氏三子字說

宋 濂

龍泉章史君有三丈夫子孟名存道仲名存誠季名存厚既皆冠矣嘗有爲其字者而其配名之義有未盡焉三子者以其父命請余爲更之余竊自念加冠制字乃大賓之責衰朽之餘精神遐漂安能與聞於斯雖然不敢辭也予聞天道付子實有恒則唯正是將本無頗僻君子脩之是之謂德請字存道曰允德何如人道之務惟在

乎誠衆善之源隨物以形其欲致之必由於明請字存誠曰允明何如地道所貴既厚且大深重弗遷宏博無際無所不負是曰能載請字存厚曰允載何如夫允之爲言信也三子者信能察之則無愧於名若字者矣雖然未也學貴能辨辨則不戾視德爲虛元而不驗之於實德者其所謂德非吾之所謂德也求明於寂默而不著之於民用者其所謂明非吾之所謂明也視載爲易足而不本之於龐鴻者其所謂載非吾之所謂載也三子者慎之哉雖然未也辨貴於行不行猶馬之無足隼之無羽宏其中廓乎使有容制乎外無使其顛沛節其欲不遠而復遏絕其未然而其天始全汨焉其若虛肅焉其若拘統焉而有樞如此方能入於君子之途矣三子者勗之哉雖然未也爾家自太傅公以來以詩書禮樂衣被於子孫極盛而休其章紱之蟬聯勳業之輝煌溢於史冊而播於士大夫之口者先後相屬也而父史君尊崇性理之學嗜善如飴厲行如金石而三子者又各有士君子之操或提義旅以鎮捍鄉邦或據所蘊以著澤物之仁或酣志書詩以繼其先緒亦既綽有令譽而予猶諄諄爲是言者進學之功無已而繼志之責不易也必使上不愧天中不愧人下不愧地斯善矣三子者勉之哉雖然未也薛氏有三鳳焉才非不高也而德則鮮也賈氏有三虎焉位非不榮也而德則鮮也宋氏有三絕焉才非不多也而德則鮮也非三子者



之所樂聞也三子者之所樂聞其殆聖賢之學乎予之有望於三子者可謂遠也已矣三子者其懋敬之哉其懋敬之哉

宋學士集

章氏兄弟字說

王禕

龍泉章三益先生以書來謂余曰吾同母兄弟凡三人焉伯氏有子曰存仁仲氏有子曰存質皆幸冠而成人朋友之間字存仁曰允恕字存質曰允忠既教之矣惟是製字之義不宜無說子尙有以重教之也蓋嘗聞之天以是理賦諸人人稟之以爲性謂之仁故仁乃理之具於心者理具於心而推之以及乎人物者恕也恕者以己及物之謂也是以聖人之教人必強恕而行爲求仁之先務是恕固仁之所以推也天以是氣畀諸人人受之爲形而質凝焉質固一於樸者然而且已趨於文矣故其所以爲質者忠也忠者渾然誠確之謂也是以三代之爲治有尙忠者矣而後繼之以尙質則忠固質之所爲本也從是論之仁非恕則莫之推是恕者仁之用也質非忠則莫之本是忠者質之先也是則存仁之字允恕存質之字允忠揆諸名義固可謂有合而稱情者也抑余聞之君子之製字也所以尊其名也名之所爲尊將望之以成人之道也故君子之志於成人者因其所爲名字者而反求之亦可以造其志矣然則於仁也力於恕以爲入德之方於質也本於忠以爲立誠之要各從其類而

致其至焉豈非聖賢之爲學者歟疏其說以貽之以际先生何如也

王忠文集

### 章嵩字豫山說

沈魯成

金華府志嵩成化戊子順天舉人官光祿寺署正  
嵩豫州之山也處五嶽之中其高且大首出衆山所以能鎮壓中土而四鎮四嶽皆離列而羅其傍者也蓋不惟其高且大而代之中嶽尊崇之則自崑崙而東無與爲埒者矣其尊高廣大如是夫孰得而擬諸其形容哉人雖參乎三才然藐焉於茲曷爲以是名厥躬不亦僭侈殊甚耶詩不云乎高山仰止景行行止君子以其極者取則焉可也是故大舜有大而爲孝之極則凡爲子者之所當取則於孝也遇象爲友之盡則凡爲兄弟者之所當取則於友于也事堯爲忠之至則凡爲臣者所宜取則於委質焉以至夫婦長幼莫不皆然際天之所覆無不取則於此蓋以古之聖人爲法法其大而取則於其極焉耳嵩之爲山夫人焉取之以其高也則所見不卑以其大也則所蓄者廣矣以其中處而得地氣之和也則無偏倚駁雜之弊豫山豫州之境豫居九州之中人而以是爲名者故吾以豫山字之崑邑貳尹永康章先生之世孫曰嵩年二十餘來從予游冠且室矣未字也其友爲之請曰嵩願有字也惟先生以言發之夫嵩豫山也山之尊崇無與比人而盡人道者宜似之山也人也皆可取

以爲法也諺曰學其上僅得其中名之以嵩庶或省厥躬哉

章延年字廷脩說

闕名

金華府志延年成化癸卯舉人官福建鹽運使判官能文章著存備考

廣西方伯章公俊民季子生三月名曰延年越十六年身漸長大有成人之道其兄廷器筮曰筮賓醮而冠其首三加三祝之餘賓乃字之曰廷脩以敬其名而重其有成也廷器欲予申其說按韻會穀熟曰年故帝王用以紀在位之數亦取穀一熟之義延年則穀之常熟也穀之常熟豈自熟哉必脩治之至也播種以時耕耘以力稂莠不雜然後熟焉又古人謂歲爲年延年則歲之長多壽之謂也壽之永長豈易得哉亦脩治之得也性情不戕嗜慾不縱身脩德崇然後得焉字曰廷脩誠得之矣然予又有說焉昔王昶以世之浮而名其子孫曰沉默渾深欲其因名思義以自謹方伯公之名子曰延年者得不欲因名思義以自脩乎蓋人之養生莫大五穀必五穀長熟而後生得養百禮可以洽矣使無脩治之力而一熟一否焉望其生之養禮之治不可得也人之脩身莫大仁義必仁義精熟而後身脩諸福可以集矣使無脩治之功而或作或輟焉望其身之脩福之集不可得也廷脩當體親命名之義格致以窮其理誠正以實其德孝悌以善其行早夜孜孜無少間斷則身修德崇而祿位名



壽之福必至猶穀長熟而百禮洽也廷脩從予遊故申其說於前而致其勉於後廷脩其勉旃

以上金華譜

### 自述字說

懋

冠而字周道也字必有說所以表其命字之義且示教也昔人有名其兄之子曰默曰沉名其子曰渾曰深而爲書戒之者有名其二子曰軾曰轍而爲之說者皆此意耳懋之少也家君又將責以成人之道舉古冠禮以教懋齋宿筮日告於祠堂禮鄉之先生長者爲賓設盥悅之具爲帟幙之房冠服備陳族黨咸集主賓擯贊揖讓登降自始加以至再加三加一稽諸禮而行醮畢賓乃命懋之字曰德且申之以祝詞曰吉月令辰冠禮既成昭告爾字式敬爾名農懋於耕禾稼乃榮工懋於作器用斯精士而不懋忝厥所生其懋維何曰德之敬厥德伊何天之明命人待以生是曰德性衆理俱全萬事斯應君臣之義父子之仁曰禮曰智夫婦主賓信而朋友五品人倫斯德之大易失難存懋之之功學先格致誠敬入門踐履實地一動一靜一默一語善必懋爲惡必懋去不厭不倦勉勉循循內外交修厥德乃尊稽古成湯有商聖君懋敬厥德日新又新周有畢公元老大臣亦云懋德小物克勤咨爾小子方茂爾年尙充爾德以希聖賢字爾德懋有意存焉顧名思義弗懈益虔覆簣成山無虧其

巔井穿九仞貴在及泉爾服我言日夕乾乾無慚厥名惟德之全懋再拜曰懋雖不  
敏敢不夙夜祇奉退卽錄其語以爲字說

楓山集

章廷佐天香圖說

潘璋

草木之植鍾英於天地著見於古今者多矣獨桂異於凡品而休禎之說昔人之科  
第顯榮者往往取徵於是詠之詩書子史不一而足以爲狀元者紅黃爲榜眼白則  
探花郎者焉桂之所以異於凡卉而見重於士林者以此客有以天香圖遺章廷佐  
者間嘗徵說於予竊聞宋之間有詩曰桂子月中落天香雲外飄圖之名或出於斯  
而圖之意則以科第顯榮者望於廷佐雖然水陸草木之花可愛者甚繁濂溪周子  
獨愛蓮謂蓮花之君子者也惟桂當秋高月白風露零灑之際亭亭幽奇貯萬斛香  
不伍羣草木其諸花之清白者與是則休徵者桂之兆而清白者桂之操也士君子  
朝夕玩焉顧圖思義於焉立功於焉立德隱然無愧於桂則亦重爲桂榮也廷佐志  
偉識高德成行著進而登庸之日吾知其必能繼踵前賢而不負諸君子之惓惓者  
矣璋也幸辱交於廷佐特少致其愛助之私如此併書之以告覽是圖者

金華

章氏會譜德慶三編卷之十五

會稽章貽賢輯撰

雜文

章文懿公遺囑

南京禮部侍郎章懋今於正德十六年五月初四日欽蒙皇上聖旨懋德隆望重陞授南京禮部尙書照舊致仕有司時加存問欽此欽遵令義男齋本辭免續奉聖旨卿德望素著名實相孚新政之初正當簡任不允所辭欽此欽遵今老病日篤桑榆景迫恐不久生於世思得先妻郭氏所生二子長擴擴生子訢訢生子夔俱已早亡無後次捷無所生子嗣止生一女已適郭愷而捷亦逝世矣常念不孝有三無後爲大今幸小妾楊氏於正德十三年二月十六日子時生得一子名之曰接年方四歲宗支有繼近憑諸友朱隆姜麟鄭權鄭緒董遵唐龍鄭某某朱時通爲媒聘定生員趙儲次女爲婦懋未往南京之前已將渡瀆祖業田地山塘悉分長男次男管業訖休致以來畧有俸餘買得河四十七都薄田共八石四斗五升俱係民田外地四片大小不等柏木一十三根栗樹一根得分塘二口山一片坐落郭村壠口盡數撥與幼男接管業外十二都嚴村坂無糧溪田約計四石上下亦撥與接管業緣長次兩



房俱已無嗣接雖幼係是親男今將前田付接獨管專奉祭祀前任郡守趙鶴叔鳴將在城久廢尼姑寺基一所勸懋出價一十兩納府買管前地起造今所居樓屋在內前地界至現有給帖爲照俱撥接永遠居住接乃吾年老所生恐不及耳提面命異日長成當學忠厚本分無忝家世長次兩房既無後別無爭競如有繼嗣亦不得爭競吾近日老病漸篤從族子姪并親戚諸友各勸寫立遺囑但吾在病中不能一親寫不得已口授諸友爲吾代書筆跡錯出示無私也衆議作一樣四本一本付接一本付親姪參政拯一本付親家趙惟用一本付諸友吾身雖有存歿然有參政拯與惟用與諸友亦可以無顧憂矣

楓山集

### 章文懿公年譜後跋

楓山先生理學名臣也其嘉言善行譬諸精金美玉市有定價愚何能贊一詞間嘗論世每恨生不同時願爲執鞭而不可得嘉靖丙辰小山先生出守吾雄實公之冢嗣因獲公年譜讀之蓋名臣所錄者概也年譜所錄者詳也愚不幸不得及公之門猶幸得受教於公之子三復是編作而歎曰讀是譜者可以見大臣進退之義焉可以見天道福善之公焉可以見世道升降之機焉夫君子之仕也爲道之行也道不行而富貴利達者君子以爲恥而不以爲榮公掇巍科入詞林僉閩憲師太學蹶而

復起起而復去原公之心豈不曰時不可徇祿不可竊與其曲學阿世失吾故步寧窮約終身以行吾志爾是故奉常之擢則辭宗伯之擢則辭高難進易退之節厲廉頑立懦之風所謂大有功於名教也是不可以見大臣進退之義乎公當強仕

下缺

章文懿公從祀議

清 全祖望

金華之學昌於呂成公忠公兄弟二呂之躬行角立張朱而又兼以中原文獻之傳則爲史學東萊嘗應詞科則爲文章之學良齋止齋說齋同心切磋又參以經制之學及門弟子固多賢者然漸趨於三者之學而躬行少減四先生起而中振之躬行者醇矣白雲所造稍淺及門之士如潛溪華川仲子又變而爲文章之學而躬行益疏天順成化之間楓山先生出而中振之先生以躬行爲主涵養深至居常龐朴和厚不知其胸中之海涵地負臨大節而不可奪也昔儒謂先生之功業雖不如司馬溫公之宏而其人則極似之蓋先生惟其龐朴所以海涵地負臨大節而不可奪而非文章家致飾於外之所能也先生嘗言斯人形天地之氣性天地之理須與天地之體同其廣大天地之用同其周流方謂之人又言大則萬物皆通小則萬理皆晰至哉言乎先生與白沙講學白沙謂今人陷溺於名利汙濁之中先令看浴沂風雩章以洗其心先生曰每日浴沂風雩祇恐流入老莊去也白沙之說未始非救時之

教而先生之箴之者則逆知後來之流弊予謂白沙似康節而先生則涑水橫渠一  
路人先生之地步較之白沙爲平正而無疵先生致政而歸所入稻田不足供其食  
之半出入徒步故其及門唐尙書龍潘侍郎希曾姪尙書章拯皆徒步傳先生之家  
學其歸家有羸俸先生卽爲不樂而拯亦自有慚色公子敝衣垢履道爲巡檢所笞  
先生不以爲忤嗚呼此三代以上人也浙中學統自方文正公後當接以先生而後  
可及陽明

魁堦亭集

天跋章繪副使先賢遺墨

王直

人道之大莫大於尊祖敬宗而婚姻之事尤人道之大者卷中李氏家祭集序江氏  
祖墓記皆拳拳於墳墓祭掃君子之不忘其先如此誠足以垂世勵俗鄧文原既有  
召命且欲爲其女姻畢而後行豈非男女以時爲大乎然且委曲不違乎禮婚姻豈  
可苟也哉此卷書翰凡七幅皆可寶愛其中乙巳春一幅遺戒子孫以脩寺事有晦  
菴先生圖書不知其所謂也學者於前賢遺墨有可觀法者皆當寶之况有其名識  
者乎章氏子孫尙珍惜焉

抑菴文後集

題章賢母傳後

潘希曾

按潘公集內有章氏重建御書堂記寄章樸菴都憲同年章道充過訪各詩



則此跋爲蘭谿渡瀆章氏作明矣惜採到渡瀆譜殘缺不全賢母之傳及姓氏無可考焉

自古母氏稱賢率於其子之成立如所謂孟母蓋尤彰彰焉者余讀列女傳觀孟母之所爲教亦誠難以其自謂夫死從子則稱未亡人久矣而卒成子之大賢可不謂難乎余嘗歎古今人未必不相及而事之難易有弗容概論者及讀章賢母傳不能不重感焉母之以賢稱視孟母未知孰難迺若方盛年時贊夫子以廣圖厥胤中道而喪所天又能忍死以成其側室之子皆情之不易克也禮稱婦順備而後內和理內和理而後家可長久說詩者謂后妃之德不妬忌故有樛木螽斯之福今章氏孝子順孫玉立蘭茁而先世之業日昌以大微母之賢而能至是乎推母之心雖爲事君者法可也獨內則也哉擬諸孟母之所處其難易又不同矣

竹澗集

跋蘭谿章道峯行人請二王出閣講讀疏

陸鳳儀

章公适登嘉靖丁未進士授行人擢禮科給事中時穆考儲位未定而天子復諱言立太子中外咸以爲憂言之禍且不測适以太子雖未卽立而出閣講讀爲國根本固所以立太子也事孰有大於此者乎遂抗疏請二王出閣講讀奉旨切責再三舉朝爲公危之而公怡然直聲蹇節震於一時既而講讀命下禮秩儼定公疏之力也

人以爲庶幾賈誼豫養太子之意公沒後復有如公言被禍者然後知公疏之難也

蘭谿譜

書新喻縣章節母吳孺人事畧後

林有席

新喻章子桂攀從余弟授經其尊人奇功手狀其節母吳孺人事畧介予弟乞傳而節母年踰七十稱未亡人立傳固將有待古來持節之婦養姑撫孤操行多同道揚盛美又苦於其詞之複而難舉也節母六十時同郡侍御王公雲煥已次第其壺德書諸錦以張之余奚以複爲推奇功之意方自傷出遺腹生旣無以致孝養於厥考幸有持節之母翼之有成而卒無以傳其母以及其父此戴記所譏於有美而弗彰者也其拳拳敦迫於余文若無嫌於其詞之複焉者余乃益信奇功平時色養善養必有交致者矣二南葛覃小星諸篇其婦德之可稱者不過勤澣濯無妬忌至漢廣行露野鬻泛及諸婦女之貞潔皆末由備採其里居姓氏以登諸錄後之人讀之以爲得與於不刪之列十五國詩首錄柏舟小序實之以共姜然劉向傳列女錄夫死守義凡十人而共姜獨遺豈傳聞異詞古之聞人往往有不能周者與予嘗歎婦人不幸以節著事遭其變而適符於永貞之用故曰柔順利貞而聖人繫易以女德本諸陽剛所謂順極而健涵也節母十八歸龍駒廿四而寡遺腹五月而生奇功遂侍

其孀姑萬氏兩世撫一藐孤持節且五十年俾葛藟得蔭其本根卒有以繁其枝豐其葉廣施與於窮荒孤獨之人以上娛其姑之老而下以遺福澤於子孫豈非其陽剛之發適符於永貞之用者乎歐陽子稱爲善者無不報而遲速有時節母撫奇功有今日奇功用自韜晦將大顯於其三丈夫子而桂攀又美秀能文節母之後昌有日矣因樂書其事畧後以爲券

新喻

翁子耀刺翁曰非意備此數以吾子之言受賦

書同邑質直章翁壽圖  
余同年友水部君乘傳還邑里几杖儼然日侍其尊君質直翁而翁且彌壽登齒以七十於是水部君將偵其初度之辰率內外諸族屬與其懿親厚交聯翩冠蓋奉壺觴以祝之且命良史繪爲圖而又屬余說其意余固嘉翁之惠慈以有訓而又羨君之孝思勤篤也洋洋乎父子之間非夫令德之熠燿吾何以觀之哉余觀古圖畫至君臣朋友之相感合未嘗不低回太息之夫堂陛之都俞樽俎之燕好方其意得氣傾山岳與俱豈植水魚之相投而膠漆之固哉然賞愛出於須臾荆棘生於轉盼及其嫌至隙開胡秦係之矣乃若父與子相安而又有福澤壽考衣冠聚於堂室之際鐘鼓鳴於庭闈之間奉觴而上壽萬舞以承顏九獻以靡厭五色以怡愉一氣同和而四時交得此亦有生之至樂而人倫之極歡也故曰廟堂之揖讓不如桑梓之攸



宜也氣誼之相悅不如骨肉之無窮也質直翁享黃耆之年履無疆之福此不足爲難而有水部君翱翔雲漢之上煢爚羔羊之節馳車旋軾被服輝煌名聲光昭容與於高堂而獻之酒醴歌聲振於金石悅澤動於山川此世之所謂難得者非耶詩曰爲此春酒以介眉壽言至足也傳之以繪畫詠之以風詩慈與孝之道昭著矣質直翁平生無邊幅衣冠樸然有古君子之風蓋予往往見之此其所以生水部君者歟

青霞集

章子敬詩小引

章子敬詩宛宛有才情樂府擬選能於古調中作新語歌行放浪自賞近體尤更滔滔遇所合作真足神暢今年春以馮先輩咸甫爲介出一編示余余首肯之且謂子敬玉已辭璞矣可望而識曰琬琰曰瑚璉矣所進者益追琢之使光彩耳居無何子敬遂梓而更謁余余曰得無速成乎哉子敬悚然曰非敢爾也將以吾子之言受追琢而貧不能如陳射洪書百行卷友人憐而付劊劊曰以此作百億身可也噓借之所不敢望追琢之則亡所不受攻余竊徵其微旨謂子敬賢乎哉何所藉我我不能爲皇甫玄晏貽子請爲射洪琴以囿諸賢士集而碎之則何如遂書其語於首

弁州四部

稿

書舒城令遂安章公家傳後

方象瑛

予與脩明史見舒城章公守城事爲之慨然太息當張獻忠之圍舒城也前後凡十有四公塞三門啟西門以待之伏火器其中賊入陷於塹殺數千人邑賴以安乃不數月公以外艱歸而城陷矣使當時守土之吏得公等數輩出奇制勝豈復憂闔獻哉公歸而閉門掃軌足不入公府太夫人年百歲侍養老而彌篤尤人所難焉者肆啟文孫以治行內擢謂非公之遺澤歟因讀公家傳書此紀其後闡幽表佚固史臣事也

遂安謝下同

遂安章公可試守舒城縣事

毛際可

余嘗作汴圍紀事叙流寇攻守事甚詳然大梁以通省全力加以周藩散金犒士始能嬰城以守其他通都名郡所過無不殘掠至於州邑數里之城寇破之如摧枯拉朽耳而舒城介於霍山合肥之間前後被圍者十有四而卒安堵如平時以邑令章公防禦之力也夫公起家儒生而能設奇制勝殲賊千餘迨公去任一載而城陷慘戮無遺矣歸里後家門擁穆有萬石君之風母夫人壽登百齡公衰老已甚始終孺慕如一日殆所謂鄉先生歿而可祭於社者歟吾邑先達名載史冊者汪公喬年以殉寇難著而公以禦寇難稱乃汪公久祀鄉賢遲至數十年而復覩此盛舉可見秉





章氏會譜德慶三編卷之十六

會稽章貽賢輯撰

詩

明成祖御賜故御史中丞章溢詩

龍泉註誤釋冤民處郡瘡痍賴至仁因是存心能愛惠自然陰德格蒼旻

其二

天道從來與善人分明報施及兒孫信知章溢行陰德父子簪纓萃一門

全城陰德誌

匡山五詠爲處州章溢賦

袁華

看松菴

匡山何崒嶂如峴窠中央萬松列巖岫夭矯蛟龍翔若人抱貞節盼柯日徜徉微吟  
息高蔭燕坐絃清商茅屋三四楹蘿翠交嵐光謾謾靈籟響陰陰芳晝長採花釀秫  
米剛苓充餼糧何殊陶貞白結樓居華陽

煙雲萬頃亭

英英白雲飛瀾漫被巖谷條若大瀛海洪濤互起伏好風來自東流膏口山木攬之  
不可得卷舒一何速危亭俯松杪冥搜入遐矚靈物既深潛陰淵寒氣肅有時出膚

寸海宇溥露沃終乘遊帝鄉矯首謝塵俗

在上亭

春山皆部婁小亭立潺顏仰觀逼霄漢俯視迷人寰  
一勺滄溟水數點甌閩山朝瞰照澗谷紅紫何爛斑  
蘭蕙茁石罅菊叢冒谿灣芳林春夏交好鳥聲關關  
醉騎黃鵠去笑挾飛仙還郎吟萊公句高風諒能攀

清高亭

層巒壁亭北靈淵滙亭西野芳新綠合巖扉空翠迷  
林深不見日地迥惟聞雞草木氣轆轤六月流冰漸  
達人逍遙遊散策凌丹梯澄懷適野性觀物在天倪  
易同醉侯講詩爲應真題急流能勇退名與三高齊

環中亭

崇岡積蒼雪羅立展屏障巘嶸犖确中芟夷得平曠  
四顧何嵬然巉雲開疊嶂山如衆星列環拱皆北向  
一亭據中央勢欲兩相亢天高氛翳消春還淑氣暢  
激水流羽觴鳴琴發清唱仰俯宇宙間覽古興慨慷

以上耕學齋集

章三益匡山行

李暉

仙人休吹紫鸞笙聽我一曲匡山行青蓮居士讀書處  
至今石室丹霞明龍泉西南

百餘里四面崢嶸翠峰起先生結庵當畫圖正與匡山景相似屋前屋後皆種松坐  
看百尺蒼精龍苔皮深含霜雪古鐵幹返走風雲從一亭下浸蒼波冷縹緲煙雲成  
萬頃中有神魚長比人翠鬢翻動玻璃影一亭上與浮雲齊赤闌干外青天低分明  
投壺笑玉女彷彿出海聞金雞東南一亭隱林樾地位清高隔炎熱人間赤日如火  
流疎簾琅玕自蒼雪最其秀者環中亭周遭萬朶芙蓉青朝來爽氣落我袂蘿風吹  
日天冥冥鶴怨猿驚歸未得繡衣今作青雲客故山回首五情搖歸夢時時到寒碧  
自古山林鐘鼎同先生况有前賢風少待功成拂衣去入門依舊山花紅

草閣集

看松菴

此以下三詩爲章君三益賦

陶安

太古有積翠怪虬託窟宅皮鱗老閱歲髯髮硬如戟晝擘層雲開夜攫明月食偃躍  
天可依忍冷冬不蟄路絕人罕到一士臥空壁每從晨啟扉終日對森碧相看久無  
厭稚子笑成癖昔自初覽時萬松皆歷歷涼陰幕窗几深黛滴巖石無乃肉眼觀玩  
物猶滯迹邇來坐菴中一松了無覿不在形色求能以神氣得堅朴藏大用後凋秉  
天德幽懷與俱化此境遂真適好風忽相過清音起窈寂

陶學士集下同

煙雲萬頃亭

前人

化工出奇變誰哉執其樞山川氣忽凝渾渾一色敷大海起雪濤宛在平地鋪煙耶



果雲耶脚底萬頃餘漠漠混濃淡悠悠忘卷舒縹緲巨林野奄忽彌八區南北知幾  
阡東西幾猶踰諒無町畦隔畝計安可拘身登太素上清曠聊自娛但見三兩峯頂  
露青芙蕖泊然脫世氛喜與此物俱或言近靈湫疑是龍所嘘長飈生樹杪天地廓  
如初

唯天在上亭

前人

一境懸太虛雲木皆脫洒去地隔幾塵結亭稱吾雅扶桑浴朝暎每在几席下仰視  
獨蒼穹更無最高者笑撫喬岳頂渤澥一杯筇飛猱不可越無怪來者寡自非毛骨  
爽胡能此陶寫我欲對明河清靈濕九野次寥與之明白榆手可把果能遂此懷石  
榻問君假

苦齋二首

爲章三益  
僉憲賦

前人

先生於此樂舉世最難堪堅守心無變方知味轉甘蘖皮冰共嚼熊膽劑能諧大任  
從天降勤劬棄宴酣  
襄陽有高節涑水更清脩愈病思良藥勞生遂遠猷匏瓜緣篠架橄欖共茶甌見說  
齋中叟年來蔗境遊

苦齋

嘗爲章君三益賦苦齋二  
律意有未盡再賦此詩

前人

染指求鼎羹悅口嗜杯醕滋味非不甘過咎終自取宴懷安酖毒豫極萌變盡所以古聖賢身勞心志苦陶漁困山澤胼胝平水土先虞戒逸樂東征弗甯處嘗膽與粉參含茹不可吐炎汗務稼穡飽暖免空窶壯士不解甲血戰拓疆宇力學在辛勤才識觀今古避妬適遠國歷險冒寒暑客有居深山卓行獨無侶苦節勵志操苦藥清肺腑焦思廢寢食堅忍能自許旨美於此得勿爲艱難沮始信茶如飴何殊雋膏乳我生清苦多薄命天賦予耐守久自安相顧樂無語

清霞洞天偕章三益僉事觀枰

胡翰

太末一爲客倏忽三四齡常恐玄髮變未諧滄海情今晨屬休暇文彥皆合并方舟濟沙步飛蓋指巖扁青霞天之表青日午正停息陰無擇木抱渴無藏冰甯知大坤維有此真福庭巨石跨千尺如梁架青冥深疑地肺開洞見天光明玉樹交左右禽鳥無一聲涼風淡如水炎濁蕩然清昔聞偶奕者坐隱交心兵相持勢方急旁睨耽若醒柯爛胡不歸海枯固其恒蠻觸遞翻覆大化何由停不如飲美酒且置石間枰

胡仲子集

雪中懷章三益

劉基

歲暮懷人雪滿天饑烏病客對淒然地爐無火同誰坐石硯生冰盡日眠栗里何時

歸白髮茅檐幾處起青煙稻畦麥隴看春及土膏泉滋識有年

青田縣志

贈樞密院參謀章公三益屯兵李溪二首

宋 濂

文武衣冠奕建安鏘鏘劍佩合官班李溪日暝兵歸寨玉壘風清馬自閑歡動壺漿  
迎道上威生鐵鉞在行間捷書比奏麒麟殿萬里排雲叩九關

柏府霜輕玉節寒繡衣直指下雲端斗牛光冷龍泉劍海嶽風生獬豸冠新國願輕  
三尺法新民終保一分寬建安家牒傳芳遠世襲金貂侍禁鑾

宋學士集

送章蘊德指揮還平陽衛

劉 璉

按存道公字允德曾任平陽衛此蘊德必是允德之誤

微雨潤蒸溽薰風變寒颼客從遠方來慰我久別離高談竟終夕感舊心傷悲別來  
渝四載世事紛若麩公私兩轆轤足跛目就眇相思不可見寤寐增歎咨憶昔出海  
門萬艘總雄師平陽古堯都下車撫惇嫠堅城屹如山謀謨出幽思吾州舊部曲字  
養恩如兒此行復千里后会知何期長川去悠悠白日正南馳驪駒已載歌別意方  
悽其恨無羽翼翔中心誰當知英賢志功業名與竹帛垂勗哉樹奇勳古昔猶今時  
深情浩難既聊寄征行詩

自怡集

送章元帥之汴梁

袁 華



孟秋天氣肅樓船出東瀛微風吹五雨初日明雙旌曉踰料角險暮泊淮陰城木落  
原野迥銜枚夜兼程大梁古魏地昔爲宋東京吹臺尙碑兀良岳猶崢嶸弱冠曾一  
遊興懷動中情努力保名節麒麟紀動名

耕學齋集

允載章生歸括蒼賦詩四十韻贈別

王禕

自我來金陵閱歷經六載取友日滋多雲萍總湖海誰其最知心生也情藹藹若翁  
中丞公高誼尤慷慨其量淵汪洋其器山嶺巖起家本詩書致位今鼎鼐眎余猶弟  
兄往往過期待古人不可見賴有若人在生能繼翁志愛我曷嘗忘寂寥旅邸中過  
從不嫌再晨游輒交申夜語恒到亥繼晷焚膏油列饌羞脯醢詩卽成諧索紙不  
爲賄生也姿甚良爲學如築壘基固益加崇力勇那嬰痲窮經鉤隱微臨文絢光彩  
摘藻掞英華春空雲鬢鬣求教生實渴待問予則餒譬如處暗室何從視高墀又如  
枯竹筇安足扶虺虺坐此真可慚生猶不予猥居然膠在漆逾久好逾倍茲焉舍我  
去契闊將無乃故山括蒼蒼笋蕨春可采臨清挹潺湲摘鮮收蓓蕾歸哉誠足誇類  
戰獲旋凱新憂固服期具慶須舞綵父書讀仍勤聖轍遵母殆卒業究遠圖失學徒  
後悔君子惜寸陰元髮容易改我方墮疎庸長路愧駑駘區區二三策不足獻君宰  
投閒未蒙恩冒進祇增罪此心獨生知盍亦匡不逮臨別傾巨觥聊用澆磊磊甯無

別離淚不效兒女灑宣室行召賈燕臺正需隗重來儻有期話言勿余給江花思漫  
漫贈別乏蘭茝短歌寫真情庶當珠一琲

王忠文集下同

贈章子端憲史遷江東并呈周憲史

前人

章子吳興彥多才遂壯圖藍田元產璞滄海不遺珠事業雲霄展年華翰墨紆苑花  
春躍馬臺柏夜聞烏辨物能懸鑑為國肯破觚從容陪憲節慷慨握兵符近日聞江  
左連城作盜區逆徒干國紀妙畧合時須况是周夫子真如漢大夫繡衣仍直指鐵  
甲每先驅佇見收奇烈誰猶玩細娛敬亭山色好勝賞未容孤

章君廷瓚在金華初見高祖詩

前人

按紹興府志廷瓚新昌人洪武初獻詩於金華授縣丞

萬古西風鐵騎來檄書南下定三台指揮獨任開邊策勳業終歸濟世才日出旌旗  
連碧海月明笳鼓咽瓊臺蒼生早願休兵甲四海重逢壽域開

金華會譜

別章仲明

林弼

此日清遊雲洞南明朝遠別鶴山巖汀洲水落雁初下海國秋深燕尚喃驛路風煙  
連細柳酒家籬落隔青衫薇垣好展神仙步莫遣緇塵上客衫

登州集

送章生梅州史

袁華

微風動蘋末木落海香秋冥鴻戾曾霄輕橈口中流口流向何許淮水東悠悠青年不擇祿高堂親白頭萬里起頃步前途遐且脩勿云刀筆賤請視漢廷侯

耕學齋集

樹護堂詩爲章仲勉賦

劉崧

莫種南山葛葛生滿堂前其蔓滋以長愁心苦纏綿不如種護草花開自年年朱英間綠葉可以忘憂悵雙飛玉蝴蝶一往不可復八月莎雞鳴露花白如玉白露秋復春佳人在空谷日暮翠檐寒采之不盈掬

槎翁詩集

送章環

凌雲翰

昔捧賓興詔歸途過富春慙慙尋故友邂逅識斯人黃卷方遊目青雲已致身世家傳象笏郇國本王臣

柘軒集

秋林讀書爲章光遠賦

郭奎

大禹惜寸陰宣尼歎川逝但恐光景馳及時當自勵禍亂非所常誰能遜其世矧伊賢者心怡然與神契典籍對先賢樂道以忘勢考槃在澗阿衡門復長閉几席不暫違絃歌日相繼椅桐交前庭雜彼松與桂綠竹植後園蔬果亦時藝霜葉初炫黃餘陰落秋霽散帙聊逍遙臨風遊復憩周遊同天理優哉永終歲

望雲集

閒處光陰軒爲章文浩賦二首

董紀



窈窕軒窗而北開百花都是舊時栽青天有影池中見白日無光樹底來酒令逡巡  
香未過棊聲剝啄夢初回闌干朝暮惟多景不着凡間一點埃

宜捲湘簾且莫垂要看清景半涵池雲過影落萍開處風起聲來竹動時對客不辭  
分險韻留僧必欲了殘棊日長猶恨無消遣彷彿仙家歲月遲

西郊笑  
端集

寄章彥才

前人

不見故人三十年偶聞近况客談邊生涯牢落身猶健壯志蹉跎髮已宣昔日孩提  
今跨竈暮年伉儷續調絃舊遊踪跡都如夢覓紙題詩憶惘然

同上

輓章生文善

程通

學不成名志肯休奈何天意拂人謀封章未達黃金殿作記先登白玉樓夜雨西窗  
閒筆硯秋風荒塚自松楸十年高誼今安在不覺沾衣涕淚流

貞白  
遺稿

涵虛館訪章彥復不值

館在月湖中  
賀知章宅也

烏斯道

按章復字彥復鄱陽人也

春風奈此玉人何賀監宅前春水多棊竈筆牀天上坐酒船花擔鏡中過紫驪何處  
嘶晴日白鳥當門弄碧波更愛小橋楊柳外石闌閒倚聽漁歌

春草  
齋集

全州道中懷前守章復

夾道松柏千株  
前守章復所植

王儼

全南走百里碧澗緣幽岑躋險屢得勝曠望清煩襟道傍苑苑松誰氏甘棠陰聞有  
章大夫昔年茲撫臨政循俗云變世遠澤尚深顧茲千植繁蕪沃猶至今天長日色  
薄風靜雲滿林我行念徒侶苦被名跡侵畏影且息蔭避喧聊洗心據牀久兀敖思  
奏邱中琴知音何寥哉猿鶴空哀吟

虛舟集

送章德遠校官自湘湖歸慈湖

王冕

我生不想圖凌煙草衣曲肱牛背眠早看紅日出海底夜看素月懸中天陰陽推盪  
幾昏曉長嘯狂歌不知老清泉白日自愉怡那信人間宦途好逍遙偶爾窮外觀之  
子已在青雲端廣文坐上新彈冠蕭爽不作儒生酸三年考績易官燭回首西風正  
黃菊白雲喜動故山秋慈湖遙映湘湖綠君歸莫慮鐵硯穿且力古道希聖賢我歸  
不用君致言門前自有梅花田

竹齋集

宿齋南宮懷遺安兄

敞

老去便安靜漸與人事疎吏散卽掩關陶然遂閑居理性猶未足焉能事詩書偶此  
值齋沐跡遠心與俱止心湛無波明月照窗虛忽念平生親遠來東海隅鹿門擬同  
調有莘乃其徒但知耕釣樂不惜年歲徂何當爲合併一寫心煩紆上以榮國恩下  
以敦友于此志竟以乖引領空躊躕

質菴文集

同安舟中書夢

啟

結髮誓偕老此志良不易矧茲筮仕初苦辛嘗備歷自赴秋官召分飛遂乖隔君病歸江東我官留薊北江山邈脩阻那能問醫藥迤危竟莫支嗚呼就窀穸兒女在孩提不復更憐恤星霜歲屢遷音容杳難卽豈謂萬里途惠然一來覲彷彿見儀容渾疑接顏色言詞儼可聞分明似疇昔諒非精神通誰能憐遠客緝辭遂成章含悲一沾臆攬衣起傍徨推篷江月白

同上

亞卿章公介壽詩

有序

陳敬宗

宣德九年十一月十有四日春官亞卿章公質菴壽旦啓祥吉辰昭慶其仲子京闈鄉進士瑾乃繪爲慶壽之圖預求請諸公珠玉以祈永年而請予爲序竊維爵祿富貴士君子可以幸而得而壽則係之於天非在己有相感之德在人  
有頌禱之誠奚可幸而得之故洪範壽居五福之首而必以德爲之本詩人所載頌禱君親之詞亦必以壽爲之先有以見人之壽考誠非可以倖致於此有足徵者公學廣而文富才高而量弘嘗爲秋官大夫矣而人頌其仁恕之德嘗爲天官大夫矣而人贊其陶鑄之功又嘗兩使南交矣而人仰其專對之才歷事三朝荷蒙聖上厚恩擢貳秩宗贊治神人協和上下夙夜在公惟寅惟清位



愈隆而志愈謙任愈重而行益謹玉瓚黃流盛德壽考固自足以臻此况其子  
瑾又克知年愛日廣求難老之章載集延齡之詠所以心祈誠禱益將無所不  
用其極理有感通福慶攸萃是宜耄耄之歸方隆而弗替無疑也壽觴苾馨賓  
筵秩旅載笑載言式燕且喜於斯之時吾知公霜髯醜顏絳袍金帶情怡氣充  
曄如神人若將與有道者遊於蓬壺瀛島之上不自知其壽齡增算也猗歟盛  
哉予與公交好甚篤職守所羈深以不奉卮酒爲愧因瑾之有請也書此以爲  
賀之序云

章公介壽詩

襄城伯李隆

鬱葱佳氣藹門庭光嶽鍾靈毓俊英翰苑文章齊永叔經綸事業擬阿衡恩頒紫誥  
褒三代秩晉春官亞六卿更喜賢郎新及第稱觴戲綵慶長生

前題

東萊黃福

少宗伯子正青春不爲功名廢簡編拜闕北來天咫尺掛帆南去路三千束芻禮展  
焚黃後卮酒心酬上壽前自古忠臣由孝子賢郎於此要拳拳

前題

邢臺張瑛

春卿此日逢華誕綺席弘開喜氣浮海上蟠桃今已熟人間甲子又將週故家文獻

原來盛昭代功勳老更優何限朝紳來獻壽衣冠濟濟總名流

前題

海隅吳 訥

早歲登瀛被寵光累朝敷歷鬢蒼蒼天開子月陽初復節屆生辰日漸長三品上卿  
司禮樂五花官誥煥文章世科有子能繩繼笑舞翩翩舉壽觴

前題

廬陵周 忱

衣冠濟濟集羣英齊向高堂祝禮卿直節舊同松柏勁雅懷嘗共雪霜清阜陶事業  
推先達班馬文章屬老成天署從容著蹟容臺超擢更馳名  
宣恩萬里綏蠻貊爵三朝荷聖明南極光生逢勝會北辰星拱際昇平暮齡晉秩  
鈞衡重令子登科祿養榮壽比喬松應不老年年尊酒慶長生

前題

富陽趙 新

秀毓東南夙有徵茲辰初度慶遐齡一陽復始春方兆百祿齊增鬢未星世族叩叩  
魁列派中朝濟濟上春卿兒孫如玉稱觴處引滿甯辭酒滿罍

前題

蕭山魏 驥

絳燭輝輝酒滿甌充庭賀客總瀛洲聲名天下方三品甲子塵中始一週阿母蟠桃  
分席上賢郎金榜擬鰲頭童顏鶴髮春長在海屋從添無限籌

前題

鹽城成 均

南極星光燭上台分明流彩照容臺已知華誕初陽復正值清明壽域開綺席歡生  
仙樂合博山香裊瑞煙迴遙知此日稱觴處應有黃封御賜來

附質菴集後

自題南圃卷

總

按僊山譜總公字克平號南村清操奇抱望重一時登兩浙名賢錄紹興府  
志隱逸傳著有詩集失傳此詩蓋從明刻文翰類選內抄出也

種桑百餘樹種蔬三五畦服茲南圃勞偶與塵事違凌晨荷鋤出迫莫歸茅茨忻忻  
花木榮溥溥朝露滋物情各有適吾生復何爲斗酒聊自慰烹此園中葵緬想商山  
翁悠然歌紫芝

懷克平弟

敵

白露瀼瀼衰老茫茫我思君子在天一方欲往從之弱水無梁永言思之寤寐不忘  
白露爲霜我行遠方比美君子如珪如璋我不爾思我心難忘爾無我思我心傷

質菴文集

不博道事懷舍弟克平

前人

按原註前使時曾賦白露詩寄之不博係安南地名也



芳草天涯路池塘夢更親去年懷白露今日感芳春  
燦燦荆花茂嘹嘹雁叫頻感懷非一事回首亦沾巾

寄克平弟三首

前人

憶別長安道經年不見書人情雖屢換心跡未應疎  
秋菊霜前種春畦雨後鋤吟窩多樂事寧不念離居

同舟纔半日分携經五載會少別時多能無容鬢改  
縮地苦無由含情空有待公庭人吏散坐對菊花秋  
塵襟一蕭散詩思兩悠悠却憶林居子閑情更轉幽

七月初六日次采石太淑人誕辰

前人

良辰嘉會憶當年此日江亭思惘然總有私心同寸草  
劬勞何處答埃涓

臥病懷克平弟

前人

客行經多旬來至娥江曲親朋俱在眼爲樂良未足  
歸來始七日妻孥欣滿屋飲食豈不時寒氣忽攻腹  
鼓胸若鳴雷攪腸同沸粥晨興怯衣單午食却葷肉  
酌酒徒冒煩飲湯等焦沃脊軟困偃腿寒倦拳局望遠  
目屢眩倚床氣猶縮甲子踰五旬老景會見促况茲  
病相尋焉能全五福誰言服官政行當佐鈞軸沙汰  
極冗食甄陶盡良牧空懷少年志寧知雙鬢禿聞君  
富良劑回生在瞬目願施一七功怯我二豎毒

枯枿長新梯寒谷回春燠談笑罄餘歡登臨窮水陸欲布酬君懷不覺書滿幅俚言  
汚清聽瑣瑣甯非瀆同上

贈士淳弟常州貳守

楚楚吾宗彥英英賢大夫掉鞅出文場蜚聲滿皇都荐承民社寄屢見惠澤敷及茲  
迹所職飄然賦歸歟行行出畿甸去去返桑榆桑榆渺何許乃在稽山隅天姥秀可  
攬沃洲雲可娛山水足游衍閑情遂樵漁時歌太平謠擊壤同康衢故舊亦來集慶  
賞多歡愉貪榮非所貴知止良可圖嗟予信何似潢潦映清渠重念同宗好氣象敦  
友于共趨鹿鳴宴出處彼此俱執手一朝別甯不增煩紆他年遂歸情來訪山中居  
同上

勉男瑾

立身毋自棄篤志務高扳學究天人際名流宇宙間詩書勤有得歲月去無還年少

誠堪畏吾今愧老顏質菴文集

寄松江章采之公瑾

只說暫違去如何竟不來莫非多契合從是久徘徊笑傲風前榻歌停月下杯却憂

鱸正美歸興又將催王舍之詩集

送章秀才歸松江

前人

挾策來京國經年未一官籍名通秘閣僦屋住長安身病憐親老妻亡念子寒恩教暫歸去不是學張翰

同上

送通政使承章有常使朝鮮

五首

王璵

已受蘇卿節還乘博望槎金章龜伏紐紫誥鳳盤花明主親頒命藩臣敬拜嘉寧煩遣荀彘環海酒爲家

三韓輿地內四郡海濤邊聖主恩申命廷臣選獨賢下情宜訪度上德在敷宣莫愛千金劍將貽漢史傳

玉節辭朝去樓船截海行天王頒正朔藩國荷恩榮鰲極雲無際雞鳴日已生邦人知禮分冠蓋出郊迎

授節褒遺服臨軒遣使臣忽銜明命重榮賜襲衣新鯨海尋封域龍江發去津涼風仙桂月翹首望車塵

茅土開封日符章鎮國時朱蒙通漢使玄牡奉殷祠獄訟邦人嚮宗祧世祚垂從今千萬歲與國永無期

青城山人集

題會稽章友讓半村居

楊士奇



半山亭子江南畔又說幽居擅半村十里松陰隔城郭幾家茅屋接田園朝聞鴻雁  
琴中落秋對芙蓉鏡裏繁投老他年定相覓欲尋禹穴訪雲門

東里續集

吳興章郎中母輓詩三首

前人

碧桃庭館四時春珠翟雲冠五福身何用瑤池覓金母水晶宮內有仙人  
上堂甘旨皆推孝主饋恭勤更讓賢八十年華隨逝水獨留女範後人傳

同上

谿隱爲章氏題

楊榮

幽人昔隱清溪濱溪中流水光粼粼常時濯足風湍曉幾度蕩槳煙波春高懷對此  
眞澹泊嘯詠滄浪心獨樂竹寒沙淨小窗幽酒醒夢迴月初落幽人乘化知幾年溪  
邊勝景還依然臨流有客想芳躅况復盾嗣多才賢當時品題遺翰墨展卷悠然仰  
先德誰云杖履迹已陳文采風流照溪側我亦平生慕勝遊武夷曾迴九曲舟何當  
爲掃溪頭石坐看一片冰壺秋

文敏集

送甌寧大尹章文郁復任

前人

吾鄉風土冠七閩建甌二邑相比鄰清和之氣此融結山水秀異民心醇風淳俗朴  
無乖戾從古迄今稱易治况當聖世仁化行令長人人盡良吏章君自是錢塘彥早

入成均與髦選驥足高騰迥出羣牛刀小試初爲縣治成綽有昔賢風人方卓茂與魯恭晨霜翳蓋躬行學春雨乘車出勸農六載守官如一日藹然仁惠聲洋溢來朝仍著尙方履課最重書考功筆關樹生涼宿雨晴還辭北闕向南行雨露濃霑雙袖濕江風遙送一帆輕邑中耆老相望久有待來臨如父母長途風景秋正佳馬上看山莫回首我皇注意在愛民守令於今務得人勉旃終始樹嘉政褒命行看下紫宸

同上

送章君贊廷嵩兄弟會試

趙睦

按遂安譜贊與弟廷嵩同舉永樂庚子鄉薦贊由漢徐通三州陞四川成都知府廉介愛民廷嵩由長清分教陞惠安教諭兩學弟子沾其化雨造就多材

山城雲霽日初長送子朝天別正忙姓字同登仙桂籍衣冠重惹御爐香天連北闕京華近雲擁龍墀曙色蒼聞說賈生年少日曾陳長策佐君王

遂安洙水譜

輓會稽竹深章處士

徐溥

一夕悲風動會稽蘭亭遺跡轉淒迷定從天上騎黃鶴浪說人間夢白雞棋局無聲修竹塢屐痕有印落花泥當時積德知多少月旦何慙重品題

謙齋文集

送平陽章自鑿授福甯司訓

其父舊爲吾邑司訓

前人

荆溪鬢舍相過日三十年來一夢如久抱青氈存舊物忽看烏帽荷新除路通故里歸應便座列諸生樂有餘想到閩州依海上荔枝榕葉暗齋廬

同上

碧湖詩

周常

山堂宮講舊亭臺地位清高絕點埃時有志和漁侶過甯無賀老酒船來華居已占千年勝長日渾如一鏡開幾度詩成閒靜玩鳶飛魚躍興悠悠

金華譜下同

前題

曾得

高人素志薄浮華住在平湖景最嘉色映閑雲微有影光涵明月淨無瑕凌虛似是升仙步艇汎疑乘上漢槎對此應知天路近好攀蟾窟一枝花

章侍御綵繡堂五言律詩

豐城孫曰良

按王英綵繡堂記廣西道監察御史章聰俊民克稱風憲之任朝廷推恩封其父文政官亦御史母爲太孺人而俊民之兄順善弟忠信居家侍二親日以甘旨爲奉縉紳大夫摘杜少陵詩所謂繡衣春當霄漢立綵服日向庭闈趨之語顏其親所居之堂曰綵繡俊民亦喜且樂也來請記

吁嗟宮講後孫子更振振寵任承明主褒封及老親繡衣榮晚景綵服照青春回首



雙溪上堪方有幾人

綵繡堂七言律詩

廬陵陳循

卿家此日高堂上繡服斑衣照碧雲孝養久稱賢達士褒封今荷聖明君雲霄雨露  
椿萱被伯仲壘簾里閉聞况是階前蘭玉滿年年歲歲奉歡欣

前題

秦和蕭鎡

堂上雙親鬢未蒼繡衣綵服共輝煌每看趨侍稱眉壽更羨歸寧荷寵光錦勅試披  
渾動色綺筵齊舞欲生香如君兄弟真難得未數燕山五桂芳

前題

河東薛瑄

山連滄海是金華華榜青林柱史家鶴髮每看傾壽酒鳳城先已探名花斑衣舞遍  
三春日繡服裁成五色霞會見高堂頒紫誥香名留取故鄉誇

前題

秦和王直

清時恩命及庭闈兄弟聯芳願不違柏府雲隨桓典馬蘭堂風動老萊衣於今此樂  
知口少在世同榮想亦稀况有璽書將寵渥龍光五色照林扉

前題

臨照馬愉

東陽佳處起高臺綵繡承歡際世康和藹慶門排雁序光生御勅燦龍章爛斑色映

三春日豸角寒生六月霜此樂人間應最少傳家猶有舊書香

前題

文江錢習禮

幾年載筆侍彤闈堂上雙親志不違驄馬三鬃華繡服雁行五綵戲斑衣承歡甘旨知常具賜爵恩榮覺更稀風紀司來全一樂無勞游子詠春暉

前題

秦和曾鶴齡

花覆庭闈春晝遲弟兄綵繡並相宜光生膝下承歡處色射臺端退直時絢綿鳳毛萊子戲覽金豸角漢官儀明看更有榮華盛重捧龍章下赤墀

前題

一門軍昌曾

喬木森森蔭華堂綵衣遙映繡衣光鳳鳴霄漢青春好鶴舞庭闈白晝長簪紱聯輝深雨露墳簾迭奏協宮商極知大扁榮閭里忠孝傳家百世芳

前題

廣陵周

豸冠久拜內臺臣兄向金華事二親綵服庭闈趨白日繡衣霄漢立青春清門慶衍簪纓御勅恩沾雨露新有侍高門同獻壽天書重見降絲綸

前題

安成劉球

執法清朝重憲臣繡衣輝映綵衣春出臨山嶽千峰動戲傍庭闈五色新近御爐香

携滿袖榮恩錦誥賜當宸古來賢達應如此節概君須似古人

綵繡堂古詩

張益

拜官在烏府養親良及時繡衣立霄漢綵服趨庭闈龍章荷推恩壽酒盈金卮借問人所樂何樂能若斯由來世積善皇天報無違忠孝克自勉聲華日以馳坐令臣與子是則還是師爲君裁汗簡千載流光輝

前題

康振

丈夫富貴固可期高堂難得親熙熙山堂幾葉賢孫子椿萱具慶歡齊眉萊衣曉日金尊酒獸錦春風白玉墀醜顏鶴髮深雨露御勅龍章昭明時一門和氣藹橐籥諸郎伯仲鳴埴簾娉女星墟好喬梓承家忠孝皇天知百年愛日春遲遲

環綉亭詩

胡儼

故家文獻自山堂環綉亭深歲月長四座清風生竹樹八窗空翠落壺觴市喧不到琴書靜賓席高張綵繡香更喜賢郎繩祖武鐵冠金豸有輝光

前題

尹鳳岐

遠近羣峰四面環一亭卓立翠微間嵐光入座秋先到月色當門夜不關疊巘獻奇林霽歷雙溪奏響水潺湲莫言白手閑中樂只恐移文至北山



前題

王英

羣山何岩巖宛若屏障開山阿有雙溪流水清如苔高亭獨峙峙山繞溪縈迴浮嵐  
霽微雨波影含晴暉嘉此亭中人襟懷淨氛埃吟詩酌美酒逸興何悠哉明當遠相  
訪竟日同徘徊彈琴坐亭上適此山水懷

封按察使文政章公輓詩

王增祐

鄉邑咸稱行誼賢早膺天寵樂餘年繡衣彩映雲霄上鸞誥恩頒玉陛前訪客猶懷  
停綵鷁傾觴不復對華筵遙憐人世成今古幾度相思倍黯然

前題四首

潘洪

賢郎方嶽正馳聲豈料椿庭隔死生五鼎奄違心悵快九原不作淚縱橫棲遲無復  
烟霞隱行誼應高月且評屈指老成今有幾西風回首不勝情  
顏如冰玉鬢如銀坐閱承平八十春恩寵正期頒紫誥夢魂何事隔紅塵尙懷結社  
長林下空想尋幽好水濱潛德百年應不泯爲歌楚些淚沾巾  
烏紗繡服雪垂肩鄉郡咸稱不老仙正擬百年登壽域等閑一夢謝塵緣林間惟見  
吟詩社溪上空遺載酒船令子識尊方伯重穹碑佇看表新阡  
客邊聞訃倍傷情爲惜鄉邦失老成燈火幸曾親令子酒盃那忍醉先生官封烏府

恩波闊誥錫龍章雨露榮千里無由躬執紼謾題哀輓淚如傾

送章俊民方伯之廣西任

會稽王 斌

驄馬馳驅到魏城風姿神氣玉壺清  
巡行聲聲朝沾雨咨訪遙遙夜見星  
持斧已應山嶽動懸旌寧使庶民驚  
誰知千載埋輪事今日張綱在漢庭

前題

建安楊 榮

象笏朱衣獬豸冠除書榮捧別金鑿  
九秋鷗鷺凌空舉五嶺風霜動地寒  
才大已爲明主重政行當得遠人歡  
還持歲晚松筠操留取高名異日看

文敏集

前題

毗陵胡 澹

虎榜青年蚤擅名烏臺九載復馳聲  
埋輪已展平生志按部重霑寵渥榮  
冀北霜飛寒葉下嶺南秋入瘴煙清  
同寅濟濟多英傑共罄丹衷答聖明

前題

江玉琳

十年風紀玉壺清此日高齋萬里程  
桂嶺霜寒豺虎遁梧岡日曉鳳凰鳴  
宸衷念切思賢佐俊傑登庸副聖情  
老我樗材無補報斗南遙望泰階平

前題

雲門沈 榮

手持憲節下青霄廣海聞風瘴癘消  
宮講曾孫光祖武聖朝御史拯芻蕘  
豸冠顯擢

恩殊異驄馬榮行志不驕名重柏臺人共羨駟車還過舊題橋

前題

陳輝

風紀需才協至公外臺總憲出宸衷澄清一道威聲重敷歷三朝德望隆玉斧移時  
霜氣肅繡衣行處瘴煙空功成早晚朝天去鈞軸樞庭待顯融

前題

五羊湯性方

清時掌憲臨西廣九載功成令譽彰德被羣黎垂厚澤威行百粵凜飛霜林花浥露  
含秋色岸柳迎風汎早涼奏最蓬萊膺寵擢好將忠藎答吳皇

前題

同郡郭仲南

十載金門待曉雞慣持白簡聽烏啼擢奸直氣秋堪並愛國丹心日與齊雅望已曾  
聞玉陛榮陞今喜拜金泥錦帆明日隨風舉帶得陽春到廣西  
闕下相看氣未同不堪分袂却西東一壺別酒秋風外十里長亭夕照中岐路此時  
情莫舍孤燈後夜思何窮天南天北應相憶好把緘書寄便鴻

祝章方伯壽詩

盱江鄧義

金華南極夜輝光著業英賢總憲綱昔日柏臺敷雨露今朝桂嶺肅風霜元圃神仙  
供火棗瑤池阿母進霞觴歡騰和氣齊稱頌福壽延絲歲月長



前題

金籍何自學

鳳曆頒春斗建寅日逢初五慶生辰金章繡斧官三品元鬢朱顏壽四旬執法臺端  
明玉雪平反筆下播陽春遐齡願比靈椿老歲歲偏承雨露新

前題

始寧謝澤

祥光集憲臺官曹趨賀早南極壽星高霜清天未曉冠蓋溢交衢旗旌接山堡憲使  
蓬萊仙丰姿負雲表持法肅且平邊氓靜無擾桑麻藹如積氛稜淨於掃初筵散晴  
旭列座霓裳皎錦琴貯遙情瓊觴肆奇抱縹緲來五城氤氳度三鳥堆盤盡交梨映  
日驚火棗嘉慶匪人謀冲融自天保耆英豈無會何似茲晨好化國書遲遲堯天春  
浩浩善頌無夸詞令德皆壽考

廣西布政使章公輓詩

魏驥

文章政事不凡材發軔賢科暢所懷激濁揚清裨盛治承流宣化陟崇階正期沐寵  
川方至誰料遊仙夢不迴老我臨風起惆悵可無雞黍弔泉臺

前題

南宮白圭

一代英賢重太阿那堪有夢到南柯臺端氣節渾無議岳牧聲名耿不磨弔鶴夜歸  
華表遠悲風暮向白楊多雙谿路畔牛眠地常使行人忍淚過

前題

秦和曾蒙簡

曾向霜臺總憲綱又從藩省握銀章十年西廣名尤著一夢南柯事可傷永夜烏啼  
山月冷清秋鶴去海雲長欲知潛德傳流遠太史銘詞燿有光

前題

會稽季駿

經濟才華屬老成歷官中外每蜚聲柏臺楊激威權重薇省旬宣寵命榮功業自期  
書太史衣冠誰料掩佳城宦途多少相知者淚溼青衫爲愴情

前題

雪川陳文

未釋嚴君服重遭慈母憂寸腸空欲斷一疾竟難瘳委蛻遺塵世修文赴玉樓登堂  
陳薄奠俯仰不勝愁

前題

桂林鄭宏

夙稟金華秀孩提異等倫鳳雛輝羽翰龍馬溢精神已拔鄉閭儁仍誇廊廟珍詞源  
傾萬斛筆力輓千鈞虎榜登高第烏臺立要津道旁爭避馬都下獨埋輪憲使公輿  
論朝廷念遠人天恩千載遇風裁一時新煙瘴行看盡澆漓坐覺淳蠻獠猶感化汗  
吏敢容身方伯期年政遐荒萬里春正當援赤子忽報失慈親桂嶺歸程急蘭江哭  
臨頻劬勞天浩蕩痛骨地嶙峋安厝工方具衰頹疾薦臻空占兩楹夢竟作九原塵

哀訃聞朝野悲歌動縉紳可憐捐館舍不復贊經綸愧我非名士多公禮上賓詩書沾啟沃志慮教忠純嘉惠無由報衷情謾自陳大招魂不返腸斷淚盈巾

輓章方伯有序

廬陵劉廣衡

章君聰俊民同予登永樂甲辰科邢寬榜進士第君由御史歷官至廣西右布政使綽有聲稱年方五十三而沒所蓄固弗克盡施然亦可謂不負初志者矣始予聞訃既嘗哭其所以爲人近奉命經其郡其子輔時爲郡庠生挾策乞言故賦此且嘉其有後也

金華有舊族家住雙溪湄素富且知教世澤先人貽及今族以盛詩禮克自持靈椿一老株丹桂芳五枝信如馬氏彥惟君爲白眉蚤歲爲郡庠易學探庖犧初舉發鄉解載試魁春闈文皇慎選士當宁求臯夔策問祀與戎敷對獨無遺傳賜登高第卓卓名四馳簡拔拜風紀耳目官不卑激揚愈聲著穎敏才難羈事孰無過誤左遷行人司甘分豈外慕節操堅不移復簪獬豸冠遠大益自期迺陞外臺長僉謂職所宜廣西古大藩逮並南荒陲俗習雜夷獠理道未易爲到官副厥職匪直祿之縻正己以格物秉公而絕私百職賴表率庶事資匡維九載當滿考功績超等夷方伯迺大拜誠荷聖主知熟路駕輕車足慰民所思追封及祖考湛湛天恩垂進進諒未已况



當未老時親歿遂奔喪哀毀身莫支一疾竟弗起翛然與世辭命也可奈何郡邑咸生悲況於同年好甯不涕交頤巍巍馬鬣封潛德鐫穹碑不勝翁仲愁千秋長若斯

冰雪堂詩

葉睦

池有冰凝既潔且清何物以之節婦之心山有積雪既白且潔何物以之節婦之節冰則潔矣有時而泮節婦之心無時而變雪則白矣有時而釋節婦之節無時而易潔白之心人皆有之衆人失之節婦全之夙夜教子式穀似之衆人聞之有感於中爲婦必潔貞節是崇爲子必孝爲臣必忠冰雪名堂有燁其光永矢無射德音孔彰

前題

李旻

貞節章家婦青年失藁砧門屏春寂寂機杼夜沉沉竹折猶存節松摧不改心清風敦薄俗誰聽座中琴

前題

樂清元應

冰堅融有時雪白久不任誰將二幻物擬此節婦心妾心連城瑜妾心雙南金金玉尙銷毀妾心窮古今口筠血淚遠湘江秋水深吁嗟節婦心惟天庶可諶

壽章節婦周氏五句詩

王鏊

山堂有母素稱賢二十韶光棄所天勁節百年冰雪皦貞心一寸日星懸萱闈永娛

萊衣綵寶婺輝騰啟悅筵圍範清風真不忝詩人重詠柏舟篇

前題

湯簾

絲蘿夢斷失相依一節無虧白髮微冰壑矢心天地老玉壺操行古今稀塵封破鏡  
春揮淚雨暗孤燈夜製衣大匾名堂良不負柏舟千載有餘輝

以上金華譜

前題五言詩

眉山吳夢節

彼美閨門秀霜居禮義敦高堂扁冰雪清節重乾坤慈竹寒逾茂蒼松晚獨存承家  
有賢嗣擬見荷封恩

松筠軒爲章仕顥作

金幼孜

舊住城東二畝宅種來松竹長偏成每擬蒼雪簷間落時有涼風坐上生長日持盃  
看鳳舞清宵隱几聽龍鳴向來數學名尤盛深識先天造化情

文靖集

晚泊新口飲章太僕舟中

倪岳

按太僕名瑄號遜菴會稽人景泰甲戌進士仕至遼東行太僕寺少卿其堂  
弟璠號畏菴膺薦辟亦仕至太僕寺卿

落日下新口遠帆時見收應判同秉燭相與更移舟海內經時別天涯一醉留遲明  
各分袂去住兩悠悠

清谿漫稿

輓蘭谿章松坡先生

吾 嘒

憶昔歲乙酉待翁遊京師寢食必與偕杖履恒相隨羨翁博古今旁及筮與醫論議  
務正大斥彼淫詖辭携子試南宮愛我如連枝哀然魁天下名位光陸離而我竟沉  
滯白首滄江湄辱翁賢父子終始不我遺翁年八十時我躬往壽之歎我再信宿強  
健情不衰今春聞捐館將信還復疑歷詢乃信然悲傷垂涕洟托愛四十載無復見  
容儀嗟翁得天壽百福罔不綏有子既顯赫有孫復爭奇既封右廷評司成又將馳  
龐公在襄陽孺子居江西隱德固其偶生榮良有差露晞雖常理山摧能不悲盛德  
莫之報拭淚書哀詞

謁松坡墓

鄭 琦

屈指桐陽後何人產大賢儒風頽復振道學絕還傳蘭桂芬芳際松楸寂寞邊感公  
知我厚有淚徹重泉

蘭谿 譜

朱塢掃墓

綸

吁嗟久不掃先塋今見松楸倍慘神一德相傳鍾豹變孤墳子立繫魚鱗遙瞻華表  
鶴何在極目峯巒龍自馴褒贈榮封貽燕翼誰知窺伺有強鄰

後羅省墓

前 人



按金華譜原註季靜公之曾與祖在焉山有羅駙馬石墩及余家園等地  
陵寢久虛古跡存鷓鴣相與話晨昏王侯舊穴惟流水竹木新陰半掩門羅氏無人  
承世業余家有土屬三村歸來細語升沉事喜有功勳陰子孫

輓宗嶽兄兼示勉諸姪

前人

兄歸何處寂無聲枕簟脫離聽鳥鳴聚首夜臺承祖母飛昇蓬島看陰晴一身兩世  
光前烈五福三多裕後生須凜遺言勤課子歧黃以外讀兼耕

輓永康進八族兄

前人

天上寒蟾掩少微林間高士已長歸鶴來華表人何在鳳出高岡日正輝蕭索松風  
悲夜慘淒涼薤露泣朝晞生前言笑猶如見極目東陽淚灑衣

寄懷族弟季靜名安

前人

君自休官歲已奢長如陶令採黃花石田茅屋爲三徑流水谿橋在幾家身外利名  
無俗慮林間風景樂年華懸知邱壑棲遲處獨把漁竿下釣沙

送族弟廷瑞姪玉山歸永康

前人

宗人千里遠尋盟爲共先公出浦城棠棣紫荊花對發芝蘭玉樹本同生牀前夜雨  
驚松竹林下春風泛酒觥酌別此時須盡醉明朝兩地不勝情

吾朝

贈廷瑞弟併期勉其子

前人

昔我登堂訪伯兄，吹簾有弟和墳聲。夜聞風雨床還對，春夢池塘草又生。舊植老槐三樹在，新培芳桂一枝榮。客遊歸去須嚴訓，待看鵬搏萬里程。

以上永康譜

送章進士綸畢姻還永嘉

倪謙

笑帶爐薰出曉朝，故園歸去賦桃夭。瑤池阿母初通信，銀漢天孫已度橋。龍虎榜中春擢桂，鳳凰池上夜吹簫。香閨可似張京兆，眉黛殷勤手自描。

倪文僖集

次韻奉亞卿章公大經

前人

志務忠誠肯務華，真言端不顧身家。名高四海人爭仰，望重羣僚世共誇。節向疾風知勁草，文從麗日見奇花。愧予亦得陪清會，細讀新詩字字嘉。

同上

奉答樂清大宗伯寄懷原韻

安

遙望神京道路遐，故園桃李幾開花。哦松有負平生志，解綬仍依處士家。一點丹心點日月，兩番忠諫薄榮華。忽聆珠玉驚衰眼，雁落雲天印淺沙。

永康譜

上章侍郎綸

羅倫

社稷安危繫一元，滿朝冠蓋獨君言。中天立極乾樞穩，萬象回陽淑氣溫。滄海雨龍潛蟄隱，紫霄雲鶴遠蟬喧。塵埃不上床頭易，孔孟門庭有後昆。

一峯集

輓章恭毅公

李東陽

極知天下無難事聞道先朝有直臣萬死不輸三寸舌一生誰是百年身英靈地已歸河嶽遺草天應護鬼神欲殉朱雲借時劍九原重斬負恩人

懷麓堂集

前題

謝鐸

迎風奔浪出驚津白首生還再造身壯節早知酬國易老懷誰使上心頻勳名汗竹千年事富貴黃梁一夢春極目東南山斗地幾人江海隔清塵

謝鐸文稿

輓樂清恭毅章公

吳儼

回天力仗一封書震地雷霆我自如海內瘡痍何日起胸中孤憤幾時攄狄公直諫安唐室商皓危言定漢儲慚愧後公三十載無由一束致生芻

吳儼文稿

恭毅章公輓詞

王鏊

六駢北狩塵不蒙秋槐深閉南城東瑤臺有月蝕蟬螻沂國典策移青宮中山誰復歌晨風桓桓章公血淚紅一章獨上驚盲聾何言周昌叔孫通直欲下從龍逢翁皇天后土昭至忠風雷激電陰霾濛當時直節誰並雄前有廖莊後鍾同一朝海內日再中疏傳萬口聞天聰擢少宗伯不為崇南邦宿留遂以終當時定策還自功依然

廊廟稱孤公

震澤集



章侍郎綸輓章

吳寬

前星力輓不辭艱往事猶傳景泰間奏疏爭光須日月官曹增重抵邱山鎬京天賜  
餘生樂浙水身從未死還千古姓名存國史特書誰許後人刪家藏

故禮部侍郎東嘉章公哀輓

諱給贈尚書諡恭毅

程敏政

早忝儀部識人龍長荷先生降禮容林下黃花方采采墓前芳草忽茸茸生榮有客  
同三省死諫何人犯九重千載懷賢憂國意臨風誰說涕無從筆墩文集

贈南京禮部尚書諡恭毅章公大經輓詩

倪岳

遠佐南銓更秩宗兩朝清宦聖恩同歸來已遂閑居樂老去猶存直諫風景泰間上疏乞復儲位下獄幾死詔贈新銜傳美諡史編舊疏表遺忠時修憲廟實錄有詔令編舊所上疏於其中晚生方切通家

誼無限深情感慨中清溪漫稿

讀章恭毅公年譜

邵寶

國論非難定惟應敢諫難一封心自白九死淚如丹遺像憑誰問新編許我看敢言  
容易拜東向欲爲壇容春堂前集

送永康章君豫山省親南歸

童俊

前年折桂遊帝鄉青雲萬里期翱翔向陽桃李何芬芳芙蓉寂寞秋水傍牀頭寶匣

韜干將斗牛夜夜騰輝光東風楊柳含新黃鶯聲睨睨出建章忽憶雙親壽且康屆  
茲初度熙春陽白雲飛處越山長灤河便買南歸航行行指日趨高堂承顏戲舞爛  
班裳高歌南山種壽觴緜緜遐算祈無疆吾親鬢髮亦已蒼歸省末由逾五霜此日  
送君熱中腸強顏爲別臨周行明朝南北遙相望

前題

盧楷

君不見人生自古貴男子四方上下射蓬矢東望太山一丸泥西顧黃河一杯水又  
不見人生自古貴英特汗簡動名耀今昔蘇秦悞佩六國印田文徒食三千客吾知  
章君最奇崛早年已負圭璋質殷勤要讀書五車慷慨安能事一室去年挾藝遊月  
宮桂花爛漫開芳叢一枝折得最高處飄飄兩袖生香風更聞碧桃花盛開賞花擬  
作千人魁主司目迷日五色芙蓉江上成徘徊忽覩白雲天外飛三年甘旨違庭闈  
買舟便欲向南去天涯愧我猶未歸把酒臨歧欲分袂况復傷春帶離思柳解憐人  
眼半舒鶯女怨別聲欲醉到家百拜高堂親雙親正值初度辰斑衣戲舞歡無已願  
祝龜齡比大椿誰言不可許身爲稷尹誰言致君不可爲堯舜我有一道太平策遲  
子早來同獻進

送族弟豫山歸省

吳唐

爾居婺州李溪澍我居台郡臨湖壩論宗共出太傅後兩家清白能承傳爲丞尙義  
爾大父會攷譜牒重脩編前朝今代足仕宦細覽簪紱光後先况爾承家夙有志一  
經在泮深窮研青年應詔登太學交游滿眼俱英賢磨礱豈但出圭角追琢况得開  
渾堅廣寒宮裏折丹桂何異一發楊葉穿蓄銳南宮俟克捷觀光上國成留連故山  
翹首幾千里白雲飛處心旌懸去歲慈親屆六袞霞觴遠憶稱壽筵來年嚴父周六  
甲綵服預擬趨庭前心懷愛日兩喜懼束書買得江南船此歸可償稱慶樂椿萱壽  
祝齊八千寧親祇暫返林下致君及早來天邊風翮深期麗霄漢鸞章更待輝林泉  
爾叔曾來筵玉筍東歸養晦今幾年明年謁選偕爾至竹林冠蓋期聯翩我家科第  
亦不乏一官獨愧淹青氈都門送別何以勉世德貴在忠孝全

送族姪廷諫豫山歸永康

綸

郇公象笏舊家聲今有賢孫復試名阮竹移來儒館發謝蘭培到辟雍生執經又憶  
趨庭禮養志還思遺母羹戲罷班衣須勉進長風萬里快雲程

送族弟廷諫還永康

唐

雅承軒旆歷長途敦叙宗盟氣誼孚馬史世家宗魯衛宋朝譜法重歐蘇中丞德業  
垂應遠太傅恩光衍更映欲溯源流繩祖武好騫鵬翮展良圖



引年歸老偶作

忠

二十年來進北雍携書侍祖出哦松圖中千日俱填實窗下分陰肯放空堯舜典謨  
勤探索商周盤誥細磨礱登科九載居光祿解綬南歸作釣翁

其二

南北從師入泮宮賓興應詔進南雍順天折桂魁多士光祿居官侍九重蒲柳衰姿  
因解綬桑榆晚景自明農試開老眼看人世只在邯鄲一夢中

其三

京國爲官賦式微半爲耕叟半爲漁雲連阡陌多栽木水滿池塘廣畜魚邀客愧無  
疏傅酒課兒喜有伏生書於今無復清朝夢懶迂門前使者車

其四

六十餘年兩鬢皤賦歸田里奈吾何滿庭風月三杯酒萬頃煙波一釣蓑綠柳黃花  
堪適玩蒼松翠竹稱吟哦薤鹽澹泊無窮樂縱是三公不換他

金華  
贈

壽南山四伯

拯

日上三竿穩下牀不須扶老步如常儘諳造物乘除理却笑渾家兒女忙抱甕誰云  
無箇事舉杯猶喜有他腸聖恩浩蕩何由報願以真純化一方

壽樂靜翁

前人

吾家善報自分明此老居然不世情純孝尙堪薰里甲古稀未足羨年庚一經坐勝金籟滿繞砌行看玉樹榮試閱參同契終卷但言安穩可長生

蘭溪渡演譜

送章君仕淳分教漢川

張駿

按遂安洙水譜仕淳公字秉粹成化壬寅歲貢任漢川分教勤於啟迪以禮致仕壽躋九旬

路入雲霄第一梯馬蹄香襯落花泥行尋碧水丹山去坐愛青松白鶴棲慶壽筵前歡欲舞昇仙橋上記曾題一瓢春酒都門別走筆詩成醉上迷

洙水譜

登科

內苑作開老改龍門雁塔作春鱗秋鶉

太平天子御金鑿奎宿光芒午夜寒漢代文章推董賈唐家科第屬歐韓龍門浪暖成頭角雁塔風高快羽翰雖是看花年尙少莫將溫飽問儒冠

賜宴

前人

風雲千載趨重華賜宴瓊林寵渥賒丹桂廣寒非月窟紫煙蓬島是天家食分綾餅堆紅玉酒出黃封瀉絳霞見說金明池上事有人聞喜不簪花

釋菜

前人

皇明右文治閭巷與膠庠橋門集多士冠佩紛踰踰少窺夫子宮巍巍數仞牆仰鑽  
靡所得矻矻窮十霜剽竊糟粕餘乘時幸飛翔釋褐謁塔墀對越儼洋洋采蘋薦溪  
毛執爵灌椒觴百拜舉彝典報本那可忘平生迂腐心峨冠講虞唐日茲筮仕初矢  
心思激昂金石勵名節忠孝恒自將期不負明訓允以酬君王

賜粽

前人

細葛香羅試新暑太平時節逢重午五兵辟盡百邪消不用釵符懸艾虎九重天上  
宴芳辰菖蒲香泛宮壺春青青菰葉包金黍玉盤滿貯頒羣臣小臣何幸遭明主承  
恩共醉薰風裡願題宮帖獻新詩納忠竊效歐陽子

賜扇

前人

祝融南來司火令大地鬱蒸如坐甑蓬萊宮中夏日長南薰有歌思解愠尙方新造  
宮扇成削玉裁雲形製精內侍傳宣賜卿士一揮頓覺炎塵清魯公詩句平生志願  
與君王驅酷吏安得牧守皆循良遠播仁風慰黎庶

送章楓山先生謫官之臨武

柯潛

獻疏黃金殿英英志不回遷官無愧色治邑有餘才點易臨溪閣橫琴坐石臺閑情  
賞幽絕猶似在蓬萊



前題 謝 鐸

春明門外一分歧滿把離懷付酒卮藉口敢為知己道強顏聊寫送行詩蒼黃落日連三楚迢遞愁雲隔九疑匹馬逢人重回首太平何日問瘡痍

來同前題 李東陽

蕭條伏枕在吾廬聞道諸公有諫書嗟我一官猶近侍愧君無地可安居江頭見月家山遠客裏逢人記憶疎獨有詞林舊知己前來清話定躊躇

前題 張 弼

堂堂翰苑三君子侃侃伊川一輩流日月當天容直道雷霆震地肯低頭衡湘路遠何須惜州縣官卑且自由寄語南閩舊提舉此生端不愧同遊

前題 二首 陸淵之

同道同心幾丈夫英英氣概眼中無名教太史留方冊貌與京民寫畫圖已把此身輕去就肯將造物論榮枯獨憐霄漢擎天手萬里擎舟入五湖

翰林四諫我同遊人物當今第一流曾勸嵩之辭復起肯隨方朔事俳優皇天后土原無愧楚水閩山任我投聖主九重勞夢卜未應閒却濟川舟

前題 顏 瑄

豈不知龍鱗不可批豈不知虎鬚不可撩但以食君之祿當致身身外榮枯豈須較  
嗟嗟章使君烈烈真丈夫丹心直與明月並赤手要將紅日扶胸中氣作虹霓吐筆  
端造化非小補孔顏道學期同歸伊呂功勳擬相伍春榜曾標第一名拜官又喜登  
蓬瀛內厨之食非不美宮錦之袍非不榮自謂先憂後樂素所志依阿苟且非吾情  
殷勤寫就匡時策惘歎誓將培聖德一言苟可效涓埃家破身危亦何惜聖恩猶幸  
如春陽不將鈇鉞加忠良遷官命作百里宰光飛列宿臨衡陽衡陽雖云遠猶勝崖  
與新邑宰雖云卑猶足施吾仁浮雲富貴何須數留取清名照今古進退無慚宇宙  
寬驅馳不憚江山苦執手送君君不留陽關三疊催行舟潞渚冰銷綠波暖楚山雪  
盡蒼烟浮我有一掬淚不爲離別灑所恨無由挽君駕我有一樽酒不爲離別送所  
賀能增吾道重獨不見潮陽一貶路八千佛骨之表今猶傳又不見長沙才子去已  
久治安之策長不朽名人志士古已然君今去此何須憐相期鍊就五色石明日歸

來同補天

關  
谿

同寅章德懋以言事去職爲之太息書此自示不寄章君

倪岳

悠悠往事不堪問默默窮愁淚暗吞敢向明時傷遠謫獨憐壯志負空言楚人但識  
湘閭去漢室誰知汲黯存愧我同官未同事端居真已負君恩

清  
谿

漫稿

述夢詩寄章德懋

有序

羅倫

辛卯倫寓廣昌菊月五日夢在城南陸克深至吾弟德懋繼至或問吾弟倫曰裁成天下之具也又曰雪力澄山因呼急脚報喬壽歡語如平日述夢有作書以寄之

故人三年別中夜夢見之相見竟何言但道舒卷時雪力澄青山雲影悠方池裁成素已具天意非公誰物情各有適隴畝真吾宜奈何三十載奔走為寒饑茲焉欣有托念此稼穡依人生孰非夢擾擾終何為榮華與道謬永貽身後嗤此懷難具陳后酒且勿辭今日不為樂他會良何期恍然攬衣起涼月空前帷

女埠夜泊問章楓山

邵寶

女埠蘓溪上幽居路不遙山風聽夕瀨江雨問春潮清秩辭新命華緘憶舊招何時拜牀下鄙吝為公消

容春堂前集

得章司成楓山先生書

前人

司成書自道卿傳千里楓山越四年風雨夢從初起處江湖心在未歸前數盤谷可容君築萬里門曾泊我船聞說臨風多感慨乾坤回首一茫然

續集

前人



楓山老矣蘭谿上猶爲人間抱隱憂  
萸菊年年彭澤酒江湖處處范公樓  
眼看儀羽翔天表心送狂瀾到海頭  
再見未能徒悵恨道卿十日定須留

後集

玉萱詩

有序

張吉

楓山先生弟沛別母遊杭得報北堂萱  
花白者數朶以爲壽徵喜而求賦

曉庭微雨濯瑤華愧殺羣芳醉落霞  
恐與蟠桃共花譜三千年一耀靈葩  
兒在天東憶此花非金非玉淨無瑕  
曾孫幾輩頭如雪袖拂寒香日未斜

古城集

送常熟章主事律歸省

韓雍

一門榮顯世稱良拜寵寧親更有光  
海上臥龍猶未起天邊鳴鳳忽來翔  
花迎宮錦

秋容好人醉黃封暮景長我亦懷歸  
莫遂不堪回首白雲鄉

襄毅文集

菊莊圖爲四明致仕章元益賦

程敏政

秋氣入墟落涼飈振疎林繁華坐銷歇  
一徑穿籬深籬東有晚色粲粲千黃金  
不隨時物變肯受繁霜侵陶令去已遠  
寥寥孰知音章君瑣園彥時名屈當今  
一朝謝塵鞅返駕鄞江潯舊社作新主  
永日消煩襟年來嬰世患未獲窮幽尋  
念此松桂友敬使丹青臨遙遙歲將晏  
采采勞歸心黃花故無恙白酒且復斟  
一酌爲子壽再酌爲子吟天意久乃定  
相期肅簪纓花神永結好冷眼窺浮沉

薑墩文集

題章元益愛菊圖卷

李東陽

種花不種菊物玩志不持學詩不學陶雖工亦奚爲隱者邱壑情幽芳冰雪姿陶翁昔愛菊此興固其宜章君本宦達斂跡東江湄林居絕衆卉愛此黃蕨蕤居與花爲鄰行以畫自隨飄搖北風外嘯詠南山詩南山何崔嵬下有荆棘枝棘多損我花路遠勞我思何當薙荒穢永與塵埃辭茲願必終遂坐待秋風時

懷麓堂集

挽莊西耕隱章處士

同知廷圭之父

程敏政

紅雲含日照西莊楚些聲中白髮長杖履忍看桑柘影衣巾猶帶薜蘿香壽於呂尙非徼福死比黔婁合謚康經學已聞傳令子功名無愧古循良

篁墩文集

壽太守乃翁

莊昶

人間萬事果蒼天既與褒恩又與年自比錢鏗無別語老知茂叔本誰賢民心冬日黃堂裏杖履春風白髮前此壽此風那止此千年東海一神仙

定山集

宿章廣文館

吳與弼

虛齋罷清話拂牀事枕席青燈滅餘燼斜月流素壁弟子富書聲感之增歎息沉疴久纏綿那由共茲夕

康齋集

贈章廣文士言

前人

俗情素寡合獨往欲無言伊誰寫湮鬱喜得章澹然絲蘿託世好金蘭契忘言青眼  
饒古意白雲多新篇顧茲蹉跎志懷古共勉旃同上

訪表兄章二伯仲

前人

長憶先君念母家慚予小子近如遐幸陪花萼相映好更喜螽斯世澤賒同上

口占授章獻章朴

前人

先後藍輿送我勤交情歲久見漓淳弟兄歸去皆傳語事業應須日又新同上

送以道姪謫倅廣西梧州府

懋

阿咸謫倅蒼梧郡骨肉相看悵別離皓首稀年吾老矣修途六月子何之須防馬援  
遭薏苡且學東坡啖荔枝到手功名當努力瀧岡猶待樹封碑楓山集

贈章憲副之楚

皇甫汈

滇池特秀五華山曾記南征萬里還江入嶠峨天作塹地經笮箐石爲關肯憚風塵  
遠壯志每談瘴癘一摧顏當時六詔多賢守聲名無出臨安右郡中夷落半雕題部  
下夔岷盡稽首君本甘泉奏賦才早從畫省擁麾來高臥口聞桴鼓息燕坐朝看畫  
戟開漢家佐理重循吏邊徼迴翔占利器伏波慷慨讐百蠻穎川超忽登口事今移  
憲節武昌西鸚鵡洲前芳草萋爲傳崔顥來黃鶴絕勝王褒訪碧雞皇甫司勳集



寄章樸菴都憲

潘希曾

三紀同年幾故人天涯蹤跡苦參辰  
閒愁誤遣霜侵鬢渴想空疑月寫神  
再歷容臺慚忝竊宏開憲府仰經綸  
何時一笑重逢地酒盞詩篇取次陳

竹澗集

答章樸菴都憲

時章在濟理漕河

前人

叩門誰遞故人書三復欣然伏枕餘  
河洛禹功方有賴東南民力竟何如  
如時清不覺衰年及別久那堪萬事疎  
太白樓頭聞駐節暮雲千里轉愁予

同上

同年章道充過訪奉贈

前人

深山何意故人來石徑苔荒掃不開  
正憶看花曾並轡休辭對菊且銜杯  
江湖未有忘憂地廊廟惟應濟世才  
一笑出門仍遠別暮雲翹首重徘徊

同上

約族弟蓉峯方伯修柏樹墳

拯

吾家柏樹祖墳塋二百年來荆棘生  
兩代尙書新左轄可無修理致慙慙

哀西坡宗長大澤先生父子爲南峯  
祀產奔走省城歿於中途是可憫焉  
俚句

輓之

前人

按全城陰德祠誌各處有功裔孫紀畧  
宋郇國公建南峯寺功德院置租二萬  
五千四百帖宋元兩朝被勢豪僭吞僅  
遺田一十七頃又被住持僧蕩盡

大澤公與幼子新奔告蘭谿文懿公拯公馳書當道蒙分巡戴公力持正議  
復田二百七十畝計租三百石永爲祀產

南峯祀產起郇公五百餘年報大功詎意一朝輕法守致令再世泣途窮孝義君應  
拚一死艱難我亦罄孤忠至今祀產還依舊却歎西坡失此翁

蘭谿譜  
下同

送章蘇齋奉使昆明牂牁還京師

席春

江東才俊漢廷良奉使乘槎下遠荒白水蒼梧瞻玉節碧雞金馬識龍章蠻鄉日落  
炎花麗瘴海風生毒雨涼抱病有丹回化劍濟時應解起膏肓

送弟蘇齋守衡州

拯

黃門換却黃堂去回雁峯前慎弗悲太守持平先有兆中丞殊擢預爲期清湘足洗  
人間汗南岳尤誇天下奇水旱向來無大患願留遺愛慰民思

樂清族兄元應到永賦此以記其行

秀山

十里肩輿到李溪午烟初起竹林西衣冠列坐簪纓盛珠履闔門長幼齊咄爾呼樽  
開綠釀欣然爲黍宰黃雞諸賓肯作流連飲何不端然暫作棲

送子蘅入學上張太君

前人

曾醉瓊林著賜袍分符暫借試牛刀惠鮮德政哀莞獨理劇才能壓俊髦門靜庭階

惟過鳥訟稀囹圄半生蒿斯民早晚成於變共覩鵬程九萬高

送姪溥赴舉

前人

爾伯龍鍾遲暮年久傷爾父早登仙吾門待爾光先烈易學從師得正傳三載較文當大比一朝奮翮在冲天叮嚀未必無私意莫讓他人早著鞭

哀素菴十首

凌翰

按蘭谿譜素菴公諱贄字思敬父樂靜翁敦厚質直博通古今公爲人剛毅近仁篤實好義守先哲之格言究文懿之緒論嘉靖壬午舉於鄉兩上春官不偶歸而家庭之樂自如嗣樂靜翁捐館配許氏繼歿遂鬱鬱以卒年四十

五

楚楚亭亭此丈夫百年心事亦魁梧誰令一灑英雄淚天地無情我道孤重摩淚眼寫銘旌粉筆紅繒造士名不信白虹委塵土紫袍無分到書生倚天長劍不須磨擲地鏗然可若何一夜風雷送歸去延平津上雨滂沱岐山竟死鳳凰雛顧影踟躕亦負吾夜雨打牕燈寂寂春風酌酒思孤孤緋衣白馬自西天羽化翩翩爾亦仙一夢不回人杳杳悲風吹淚落潺湲執手依依憂畏途不知葬地有還無青山白骨爾歸去四海五湖愁殺吾



一杯新土可憐人千里名駒空此身狐兔秋風猿夜月荒山何處不傷神  
謔浪歌呼在眼前而今獨抱紫煙眠玉樓索賦賦何事好把丹心奏上天  
山水奇絕便著脚風雲變幻多含情平生豪氣今安在一點靈光散太清  
慷慨豈無真節概春容猶有古文章草堂寂寞人寥絕衰柳寒鴉空夕陽

送章道峯大行北上

李昭祥

祖席歌闌彩鷁翠江干回首夕陽孤登仙不羨班生駕赴闕須懷鄭俠圖世族師承  
應自得病夫鍼砭向誰需洛中故舊如相訊獨臥山城聽鷓鴣

十日登臺同章行人張虞部胡進士賦

謝榛

昨朝已負龍山約今日登臺意未關九塞雁聲南下晚七陵雲氣北來寒笙歌擬向  
空中度宮殿遙從樹杪看上苑黃花霜露遍誰憐秋色漸凋殘

四溟集

同馮少洲二難餞章景南大行使上黨

前人

官舍延星使燈前數舉觴何當添夜漏聊復駐春光鴻雁北來盡關山西去長贈君  
有芳草歲晏莫相忘

同上

送章景南行人使閩中

前人

春盡天涯感別離滄波極目去帆遲江南到處襄芳杜海上先秋薦荔枝明月每勞

燕市夢白雲遙寄越鄉思山靈暫爾留旌節獨立西風賦武夷

送章道峯大行南還

栗應宏

季子西來駕駱輿誦詩專對曳華裾客心計日思鄉縣王事經秋奉簡書江上芳蓀何馥郁山中叢桂亦扶疎與君南北憐歧路別後應須夢鯉魚

送章道峯大行使潞藩

李攀龍

使者持符下風塵叱馭前諸侯城赤狄列嶂擋青天牟麥祈年時芙蓉避暑筵相逢多愛客共賦遠遊篇

章行人自潞州復之大梁二首

謝榛

西盡千山驛道平天連上黨見孤城王孫爭識皇華使芳草應多薊北情  
黃河南去訪鄉枚駐節花邊苑開鴻雁至今悲帝子風光猶是舊池臺

送章道峯給諫告病還金華

徐中行

三載都門惜滯留春來歸夢繞滄州匡時汲黯頻移疾能賦相如早倦遊倚杖天臺飛瀑下掛帆月色大江秋河梁別後誰携手擊筑燕歌迥自愁

贈章兩峯先生詩十首

姚岳祥

南斗回佳氣乾坤此更勝五雲淨阜蓋萬壑出清冰野外看馴雉庭前欲結繩史臣

簪白筆歸報郭丹能

彌望河隄草芊芊拂紫塵賢人來作牧無地不生春寵語回神豸晴烟躍錦鱗招陪  
宣室夜早晚聽絲綸

萬里專城吏年來得象先含恩歌麥穗免恥識蒲鞭訟息烏爭下風清鬼欲遷漫勞  
聽馬使課最報堯天

五馬來南服兒童夾道迎不知官有賦但識野堪耕白璧含霜潔朱幡耀日明仁聲  
蜚四遠側耳聽軒轟

荆人售其璞諸國競相珍至寶終難掩逢時自有神炎荒誰採俗漢吏足稱循會植  
三槐省先占列柏春

阜囊溫語發青眼使君賢心比陽城苦名居召父先高杯翔燕雀任德薄鷹鷂溟海  
秋千里凌飈一鸚翩

凜凜埋輪客翻騰華袞褒窮簷安火作刺史獨心勞一室清琴鶴三春陰李桃褰裳  
風習習黎白拜干旄

梁公餘信惠元結足清廉我究循良傳君將往哲兼蘭臺春色動竹使劍鋒銛枳棘  
棲鸞鳳無煩冀久淹



穎川金未賜柱下譽先隆總總民歸德靡靡草偃風單人宵棄釣趙女晝提籠試就塗歌聽美哉有薛公

握珠誇越客宦計逐南雲倚劍千峯紫褰帷五嶺芬絃歌聲不斷卓魯政無羣今日

陵江水清冷却爲君

關溪譜下同

送章三峯年丈之餘干

趙志臬

末路侈炎赫瀉風滋寂寞君能秉真素不與俗棲泊冰壺堪無埃荆玉完未璞先民有餘詩俯仰寧愧怍論交歷三紀金蘭契然諾所願匪榮名而胡計卑約一枝托棲鳥百里甘屈蠖何當答昇平宵衣軫民瘼朱絃操薰風赤日傾葵藿銅墨歷饒陽鄱湖帶疆郭湖水清且漣恩波類磅礴皎月照窮檐春陽遍幽壑眇彼循吏編熠燿流螢爚愷悌並生成羣黎寧異膜何如武城宰牛刀試禮樂兩施川出雲威動霜飛鏗無爲煦煦恩渤澥輕一勺君去日已遠我思夜如昨迢遞隔歡娛羣居懼離索樽酒悵臨歧關河杳飛藿行矣天一涯努力相依託

奉輓章老年伯方塘先生

吉水羅洪先

按青陽譜方塘公諱杲字子謙太學生以子允賢貴贈徵仕郎吏科右給事  
中有行狀

太學早通籍明庭望拜恩徒懸百年志竟逝九原魂蘭佩空江幕銘文掩墓門何時  
推寶劍白日聽哀猿

有才標國望無術鍊長生郊路飛丹旆泉臺閉素纓華山愁月魄秋浦咽波聲令子  
揚芳譽追封頒帝京

青陽譜下同

贈章候允賢赴貴溪任

按允賢公字汝愚號九華詳註卷九

夏言

象山茗亭列如障小邑千家住溪上金沙迴環玉帶圍吳勔神峯屹相向開衙臨水  
復面山東風滿城桃李顏麗譙沉沉白日靜鳴琴寂寂青春閒使君一見知奇士九  
華自昔鍾靈異鸞鳳清含霄漢姿驂騮穩帶風雲氣簿書聊借經綸手豈弟久稱民  
父母道誼還資屬後生征科正賴寬農畝國朝令尹賢者誰前有徐盧後有章邇年  
范薛固其匹近日方袁皆有為况君高才凌數子定擬循良書太史飛舄遙憐下紫  
冥摺笏還看待天子

並見廣信府志

登蓮花絕頂書似章汝愚

王守仁

靈峭九十九此峰應最高岩棲半夜日地隱九江濤天礙烏紗帽霞生紫綺袍翩翩  
雲外侶吾與爾同曹

吾將入九華爲章九華汝愚作

湛若水

九華翠色入雲齊一角青天爲爾低卽欲撥雲問天路雲深天路恐無蹤

章三洲侍御謫推興化府叙復揚州郡丞

王慎中

維揚風物好不比漢長沙半刺官雖冗量移渥已遐娥眉空賈妬白璧本無瑕好取原冠拂朝中待觸邪

叙遷猶佐郡怪爾意能安祇有簿書急誰當禮數寬高才宜見屈枉道亦何難雨露清時澤無爲薄一官

贈章三洲

前人

高才早戴惠文冠驄馬瑤珂白玉鞍袖裏諫書人不見朝端簪筆衆爭看一封承譴君門遠萬里投荒嶺路難折翅鷗鷹仍養翮清高秋漢待高搏

題章三洲易學紀成卷

朱澗

天覆與地載大易行其中先天地而有後天地而終氣機自活潑理趣何冲融嘗聞古聖人爰有包犧氏洞徹陰陽關妙寫鬼神祕乃始作八卦重爲六十四畫成方有易易在未畫前一畫復一畫其勢皆自然先天雖無言默焉思已傳爾來幾千秋聖聖凡屢作先後互發明粲然在心目昭揚玄中玄所以覺後覺孔氏編三絕猶著爲



六經家傳而人誦萬古垂日星聖朝重置師教育充明庭吾莆富鴻儒正學紹鄒魯  
古老相沿襲近習述太古六經缺其一無乃太莽鹵夫子臺中彥謫官海上潰時哉  
深易道樂矣闡人文端然坐臯比開口吐所聞疊疊啟青襟無徒資誦讀剽竊口耳  
間祇用媒利祿善學顏子淵庶幾不遠復下士未聞道悔吝動相求既蹈復恒凶或  
承覆餗羞洗心從君學庶用寡愆尤

天馬山房遺集

獄中慰章秀才

楊爵

萬事總由命宜須安受之但求一念是莫歎百憂罹窘迫宜自處將來做廣居樂天  
境界上得到是男兒

楊忠介集

贈章少府

余翔

豫章需上國一命佐鳴琴寫借雙鳧影庭分五柳陰賢勞推驥足撫字見鸞心自是  
神仙尉鶯聲轉上林

薛荔園詩集

挽族嫂陳孺人

靄小樸

按渡瀆譜孺人瓊之妻年少孀居苦心育子成立人稱賢母

嫂氏孀居六十年癸癸獨立世稱賢勤勞育子承夫嗣儉嗇成家結善緣地下柏舟  
真比節鏡中鸞影實堪憐他年柱史旌門第綵墨傳芳字不鏽

哭章小僕太守

李得陽

張翰秋風掛冕歸卜居深處世情違江蘆滿目時常嘯籬菊盈門數舉卮青眼幾年勞我顧白鷗今日伴誰飛行庭空有秋容句都作延陵劍淚揮

輓章小僕

鄭國賓

公子翩翩濁世中筆花常掃五千雄訛傳別後騎驢去又使年來掛劍空玉露山前留赤烏秋容堂下想悲風一尊未盡人間志肯向泉臺泣路窮

吾宗元江先生自湖庠升任之寧洋詩以送之

德清嘉禎

仙華雲烟接蒼弁先生絳帳鬢宮畔譚經廣座傾春風摩義高宗薄霄漢竹翠時浮花下樽燕泥每落窗前硯七年一調向南天桃李不言意無限烏程有酒茗有華盈盈一觴隨春槎蘇湖遺教齋仍在閩海音書路太賒最是青氈一片色吾家舊物憐天涯

送章元江司訓之寧洋任

歸安張睿卿

寶婺章園世澤長誰能比之鄭公鄉貂冠蟬冕簪纓滿桂馥蘭芬奕葉昌歷唐迨宋幾廊廟名臣崛起扶綱常熙朝偉杰佐景運隆功奇業葱文章楓山理學寰宇重濂洛鄒魯同輝光江南四姓不能埒璽書制勅仍輝煌哲孫彪發瑚璉質才如繡虎不

可當藝林射策偶不遇橫經鼓篋在茗陽正身律物立標準升堂振鐸名愈張弦歌  
直比游與夏學術詎數荀與楊庀工修廟理祭器循循弟子多賢良柏臺交薦騰美  
譽安定先生可頡頏青氈一片時危坐左圖右史日徜徉力修世譜起凡例蒐羅筆  
削歷秋霜連篇累牘聚金玉俯仰述作萃琳琅六年薄俸甘苜蓿辛苦校讐成縹緗  
一朝遷轉度海島及門繾綣激衷腸青編四海競傳誦英詞高誼薄雲蒼野看當宁  
下徵辟揮毫編纂石渠傍如椽之筆嗣班馬繩武應知理學章

送兄行

宗山

送別河梁萬里遙龍媒馳騁上雲霄玉堦振珮恩波近初靜鞞聲正早朝

憶兄詩

前人

自別容儀後蹉跎半載餘未逢千里雁難寄一封書怏怏情何切拳拳意不如相思  
無日盡心逐白雲飛

拜父墓

前人

雪飛雲凍暮天低拜掃松楸思轉悽欲見親顏無處覓愁聽寒鳥隔山啼

送姪南崗捧詔江西

前人

才擅黃華任輝煌江右旌九重王命渙千里使君行夕照城邊路秋風江上情恩光



應有賴萬井轉春生

送章蒲圻之官

嘉禎

傾蓋語日斜，口風吹口竅。惜哉越鷄翰，遇鵠不能抱。眷言激獎私，忽駕就遠道。尙矣漆園心，爲吏不敢傲。

徐文長集

與族弟杜庵會譜詩

嵩

五百年前是一家，北山入贅到金華。宋時宮講書堪考，吏部天官德可誇。水共源頭皆派衍，木同根本各開花。我今會譜明昭穆，罔俾尊卑亂似麻。

和會譜原韻詩二首

前延年杜庵

宋臣科第舊名家，寶婺分來幾歲華。十世傳爲三百載，山堂名後古今誇。書香一線光諸譜，義葉千枝結五花。幸得宗英通會喜，至今令我賦絲麻。鄣國傳來已一家，何須分贅始金華。派從姜水鷹揚溯，盛向八閩渤海誇。積善培仁爲大族，敬宗尊祖豈虛花。有時統合諸章盡，穆穆昭昭直似麻。

示子

訥齋

汝曹爲學莫求名，實地功夫在篤行。靜裏有天涵化育，眼前無事樂耕耘。尊師取友端型表，博古通今務講明。一切異書休浪讀，唯研性理破疑城。

蘭溪譜

送同邑章東僑江右憲伯

沈鍊

憲卿持節鉞千里障元元不因飛白簡何以駕朱軒  
夜月清征旆秋風壯別樽知君歷荆楚所至有平反

青霞集

章道華見訪田居作

王世貞

抱影寒廬下春風怡然來問言何為爾有客訪蒿萊  
田家無夙供雞黍差足陪斗酒相勞苦慷慨興往懷  
撫衷雖難偶循跡幸未乖携手望白雲海色正崔嵬  
因君明漆膠友誼誰終諧

弁州四部稿

贈章道華憲副

前人

相逢慷慨欲如何銅柱銘成鬢未皤病後風波無  
蕙苾歸來天地有松蘿名山禽向終應徧小徑羊  
求好並過為問洛陽車馬客千秋業就許誰多

同上

送章道華提刑之江西

前人

舊傳分鼎業色重有洪都日月疲龍戰乾坤撫駿  
圖山今奠廬嶽濤不震彭湖伯仲桐圭啟東南竹  
箭輸異時忘帝力驚代得賢扶子也漢廷尉才其  
楚大夫秋霜動旄傳夜斗辨昆吾勝概揮毫出妖  
氛攬轡無魚跳廉訪佩虎擁使君符匣日青驄馬  
鳴風金僕姑感時冠欲立憶舊眼堪枯八葉仍英  
主千秋仰睿謨樓船南下瀨車騎北

單于地力傍搜盡天心轉鬪孤祇應三表擅不必寸丹殊倘遇王尊道相期莫忘驅  
上同

送章叅岳之蜀

皇甫汈

移藩因重寄倚棹惜離羣路向巫山去江從巴水分鄉書秋雁達客夢夜猿聞聖代  
文誰似行當薦子雲

答章憲使

前人

得罪因明主蒙恩念逐臣猿啼嶺表夜花發日南春共就青山臥俱逢白髮新裁詩  
渾欲報往事不堪陳

皇甫司勳集

秣陵旅舍送會稽章生

董其昌

君不見禹穴高峯百丈奇千年王氣山之垂又不見蘭亭觴詠飛雄筆天花盡灑分  
顏色會稽山水鍾韻士風雅翩翩多羽翼章生磊落名家駒湖海意氣無人如全越  
文章歸領袖三吳人物爭吹噓烏衣幾出蕭關路千里青山滿擔書涼秋八月口都  
門逆旅相逢如夙好黃公之壚酒新釀唾壺擊缺仍悲嘯令我神情太口生三杯耳  
熱都傾倒我本吳中口更儒屠龍之技世所迂前身不獨疑詞客執筆曾經佐褚虞  
胸中癡口不能盡閑寫秋林木葉疎多君眞賞足青眼不似傍人只好筭君今久客



吟思越戎裝飲馬秦淮月天涯聚首幾彌旬那堪更作天涯別山陰風物性所親地  
主如君不厭頻試聽寒夜江頭雪定有扁舟訪戴人

容臺詩集

戲章仲玉寫楞嚴經且用自解

王世貞

要君日日寫楞嚴曇蘂村頭捐素縑夜望神光生口角朝疑舍利吐毫尖行歌劍客  
縱將蒯調笑書生舌欲黔真箇法門無一字五千函卷是誰添

弇州四部稿

和會稽章爰發秋夢詩二首

凌義渠

按爰發公名重崇禎丁丑進士福建福清縣知縣原註公夢一異人授以斬

慧守拙四字

分明熱燄裏一枕借虛涼看劍難言利抽絲俄覺長夜分魂氣肅燈暗影神忙起滅  
知何極紛然不可量

一畫淪陰劫中天散積暉男兒須用殺智者好藏機蚤以攻爲守當緣戰始肥葛藤

牽未了斬却乃言歸

凌忠介集

寄懷臨川章大力

有序

前山人

癸亥十月予夢大力折一桂枝分贈遂爲前後同門之讖乙丑春日始晤於  
燕邸神情面貌髣髴夢中所見亦一奇也

望氣非一日于焉捉臂親乍看憶曾識猶疑夢中人君應脩月手携我踏桂輪桂枝  
樛相引恣汝砍爲薪爲余擷其一餉以紫羅巾有月明可掇捫體滑如銀覺來香繞  
枕口口咽餘津誰能精物隱感悟在茲晨對君一樽酒其故乃可論吾師九秋榦撥  
皮皆天真冥心寄尺幅有願無不伸玉曜併瓦質所荷同一甄君詞多詭峭君意何  
淳淳荀韓原道德機設別有因後先緣最巧睽合聽於神獨慚蚊蠹影配擬本非倫  
稍知尊所慕竭力以自文忍遽辭我去門外卽風塵奇光深自惜贖古未爲珍願與  
貞斯義別語不嫌諄再見桂花滿心心託秋旻殘夢猶堪續宛在江之濬同上

壽章蟠木先生

劉宗周

先生骯髒姿膂力絕九鼎莫重非積習一朝鴻毛等深山六十年屹坐蒲團醒日用  
十二時誠敬以志警病非西來意短綆汲深井苦行截刀鋸痛徹忽有省道在洙泗  
間遙遙下葱嶺

壽章雁峯舅

前人

五月南風江荔薰江臯有客傍清芬形容老得披裘似矍鑠朝看抱甕勤此日白衣  
堪送酒何方青鳥又停雲百年重許登山屐取次追陪興不羣

劉子全書

章丹一別予東渡

郭濬

廿載論文氣似蘭相逢猶是鷓爲冠囊餘立草誇經術贈乏綈袍識肺肝林霽竹松  
初傲雪江空鴻雁不辭寒此行莫漫嗟分索三徑春光待倚欄

虹映堂詩集

舒城章星華邑侯丁外艱歸贈行詩

胡守恒

百雉孤城附斗間役疲財匱冷溪山安居猶自難爲計况復烽煙數往還帝念吾民  
使綏靖特簡神君垂庇廕保障殊勳震闕庭么麼奪魄知難近遐時加意撫凋殘鴻  
雁於恒百堵安百里桑麻重吐秀堪給晨炊與暮餐戶說詩書皆子弟憐愛由心非  
強制菁莪沐澤幹捎雲桃李當春花拂地三年卯翼政方新擬向天門借寇君無那  
白雲傷孝子却教素旆引行旌侯以艱去無所顧吾民失侯如失怙臨歧餞送非常  
情飲泣吞聲淚如注君不見召公憇芟羊公碑千古流傳兩垂思

前題

浙江巡按任天成

異政推何地相傳淮右偏竹爲童稚馬蒲作罪人鞭烽煙隨雨淨桃李入風妍攀轅  
那可得瞻雲意黯然

前題

胡永亨

宵衣天子念蒼生用汝爲霖潤小城召伯棠陰籠百里河陽花蕊綻千門宓琴流水  
民無愠偃室生塵我未登大椿老矣成龍去白馬言旋鶴傍人



甲子會脩省志見先君與先伯舒城公同光志乘喜而賦此 潤奇

薄宦西冷已八年一腔詩酒耐寒氊弟兄學業編彤載叔姪文章海宇傳久羨全城

紹祖澤更憑遺笏付英賢小臣幸得叨隆典奕代勳名汗史鐫 以上遂安泚水譜

輓會稽聞然章公殉難端禮門 史可法

按紹興府志公諱尙綱爲秦府左長史崇禎癸未陝西城陷投印井中冠服

趨端禮門雉經次年臺省疏聞予廕祭墓建祠贈按察司副使清乾隆四十

一年賜謚節愍祀忠義祠

久相無慚匡救勞憂時有淚濕征袍長才落落淹閒秩大節巍巍任冷曹風馬秦關

迷皎日松楸越國湧寒濤孤忠自是標青史端禮門前氣獨高 解山譜

章格非給諫典試楚中以楚士全錄見贈賦謝二首 郭潛

按併山譜格菴公曾奉命典試湖廣題內格非給諫當是格菴給諫之誤

青瑣仙郎蓋代才千秋衡鑑五雲開從知珩璧原誇楚况有明珠照乘來

豈有金臺築帝州龍媒楚甸一時收勞君剪拂還增價蹠躩霜蹄萬里秋 虹映堂詩集

餓中漫詠十絕 正宸

按正宸公號格菴聞懷宗殉社稷溺水不死自剄亦未死嗣營葬父母事畢

於丙戌秋叩辭宗祠擬殞於墓側自稱僑東餓夫故題曰餓中漫詠厥後削髮爲僧不知所終

江頭日日陣雲深翠袖酣歌肘後金一夕星兒飛數騎旌旗十萬委紅塵  
幾回灑血殉胥濤却被鄰舟誤此宵荆棘滿前何所適忍將活計託僧寮  
踏破雲溪十萬重蕭然子影怯西風迎眸無限傷心恨夜夜江山入夢中  
惆悵西山探蕨薇挑燈看史淚雙垂當年文謝成何事空與兒曹作話提  
邦家興廢豈由天所志無酬又二年殉節諸君相待久偷生不值一文錢  
瀏覽遭逢非一端丹心青史總難瞞隨緣放手尋常事敢作成仁取義看  
伶仃僵骨僅支床野老偷瞧驀地傷口此無生清受用一條布衲一爐香  
個中領會事如何咬嚼虛空滋味多南北東西皆大道橫挑擔子笑呵呵  
中原誰起共匡扶天若多情淚亦枯不是華夷分不得人心久矣化爲奴  
祠堂蕭瑟日黃昏何處啼禽慘斷魂珍重君恩難報答辭殞不覺又兼旬

盛夏奉寄章莪山先生湘陰軍中

王夫之

越中文獻輯存

戎馬六月正閑閑救日朱弓向月彎銅馬已聞心匪石巴蛇敢恃骨成山中原冠帶

壺漿待閩海絲綸檠戟頒師克在和公自省丹忱專在念時艱

船山遺書

歸香

夜泊湘陰追哭大學士華亭伯章文毅公

前人

殘煙古堞接湖中，認是湖南第一城。  
雲閃靈旗魂四索，波搖旅夢月三更。  
愁中孤掌羣眉妬，身後傷心九廟傾。  
近築巴邱新戰壘，可能抉目看潮生。

蓋齋詩  
編年稿

憶大學士章公曠

字于野號莪山華亭人贈華亭伯  
謚文毅丁亥死事於永州

前人

釣舫泊湘陰，痛哭波聲撼靈旗。  
閃宵空湖風捲，荻蕩歸來臥荒山。  
淚墮楊花糝公子，相嚮悲北雲。  
仍黯黯相送旋吳淞，生計益慘淡。  
國亡家何有，知公無回覽。  
淒涼任東里，徒增孝標感。  
憶昔侍暑坐蕭齋，題認膽血汁濺。  
千秋山翳一時感，書生言無私微語。  
公但領既憂夏屋欹，復念春飴噴。  
因之荐狂言，屑口勤鉛槧。  
覆敗愚所知，同舟自汶閣。  
從公騎箕尾，戢志填泥涵。  
尚口既窮困，羣心故習坎。  
塞臆奄頽齡，坐視皇天潛。

蓋齋詩  
分體稿